

MARCI TVLLII  
CICERONIS EPI-  
STOLARUM LIBRI

QUATTOR,

Ab Ioanne Sturmio puerilis  
*educationis causâ selecti,*

Et ad castigatissima CICERONIS ex-  
*emplaria recens collati.*

*Quibus adjectâ est etiam difficiliorum locorum  
brevis explanatio, ex Francisci Iunij,  
Pauli Manutii, Simeonis Bosii  
Commentariis descripta  
Per I. R.*



EDINBURGI

Excudebat ANDREAS HART. 1634.



INTEGERRIMIS ET PROBIS-  
SIMIS VIRIS, DD. PATRI-  
CIO GALLOVA, & IO-  
ANNI HALL, Ecclesiae,  
Edinburgensium Pastoribus.

IOANNES RAYUS.  
S. D.

**L** Evidense munus hoc (viri graves) vobis offero devotæ in  
vos observantiæ meæ, & benevolentiae in Rempubl. literari-  
am arrationem. Epistolas Ciceronis quas iuventuti præ-  
legendas Io. Sturmius selegit, nuper excudendas curavi, quod  
hanc operam plurimum conducere censui, cum ad frequentes pas-  
sim mendas quibus librariorum incuria scalebant eluendas, tum  
ad submovendas salebras, ad quas subinde restitabant mediocri-  
ter literati, in tenui labor est, fateor, neque enim laureolam in  
mustaciis quæro: neque in iis corrigendis famæ, aut gloriolæ, sed  
officio, & puerorum institutioni operatus sum: nempe ut dis-  
centibus quotidianum restituendi molestiam minuerem, & hac opellâ  
exercitationis meæ rationem vobis Patronis, ut par erat redderem.  
Non de fore tamen intelligo qui à triviali quovis magistello decan-  
tandis Grammaticæ minutiis assueto, hæc potuisse præstari dicent:  
sed adversus Sycophantarum morsus quia non invenio remedium,  
eorum ego gratiam odiumque iuxta æstimo. Bonis placere studeo,  
non plurimis. Vobis (qui æqui rerum æstimatores estis) si feli-  
citer & fideliter operam in suscepta provincia præstitisse videbor.  
Theonis & vaniloquos nihil moror. Valete, & Rempubl. litera-  
riam curate, ut facitis.





M. TVLLII CICE-  
RONIS EPISTO-  
LARUM SELECTA-  
RVM LIBER PRIMVS.

M. T. CICERO TERENTIAE S. P. D.

*Famil. Libro 14. Epist. 22.*

**S**I vales, bene est: ego valeo. Nos quotidie tabellarios vestros expectamus: qui si venerint, fortasse erimus certi-  
ores quid nobis faciendum sit, faciemusque te statim certiorem. Valetudinem tuam cura diligenter. Vale Kalend. Sept.

*Tullius S. D. Terentiae suae. Fam. 14. 21.*

**S**I vales, bene est: ego valeo. Da operam ut convalescas: quod opus erit, ut res tempusque postulat, provideas atque administres, & ad me de omnibus rebus quam saepissime literas mittas. Vale.

*Cicero S. D. Terentiae suae. Fam. 14. 8.*

**S**I vales, bene est: ego quidem valeo. Valetudinem tuam velim cures diligentissime: nam mihi & scriptum & nunciatum est, te in febrim subito incidisse, Quod celeriter me fecisti de Caesaris literis certiorem, fecisti mihi gratum. Item posthac si quid opus erit, si quid acciderit novi, facies ut sciam. Cura ut valeas. Vale Datum 4. Nonas Iunii.

*Tullius S. D. Terent. suae. Fam. 14. 23:*

**S**I vales, bene est: ego valeo. Nos neque de Caesaris adventu, neque de literis, quas Philotimus habere dicitur, quicquam adhuc certi habemus. Si quid erit, certe faciem te statim certiorem. Valetudinem tuam fac ut cures. Vale. 4. Idus Sextil.

*Cicero S. D. Terent. suae. Fam. lib. 14. Epist. 24.*

**S**I vales, bene est: valeo. Reddita mihi tandem sunt a Caesare literae satis liberales: & ipse opinione celerius venturus dicitur. Cui utrum obviam procedam, an hic eum expectem, cum constituerò, faciam te certiorem Tabellarios mihi velim



LIBER PRIMVS.

quamprimum remittas. Valetudinem tuam cura diligenter. Vale. Prid. Id. Sextil.

*Tullius. S. D. Terentiae suae. Famil. lib. 14. Epist. 17.* 6

**S**I quid haberem, quod ad te scriberem, facerem id & pluribus verbis, & saepius. Nunc quæ sunt negotia, vides. Ego autem quomodo sim affectus, ex Lepta, & Trebatio poteris cognoscere. Tu fac, ut tuam & Tulliae valetudinem cures. Vale.

*Tullius. S. D. Terent. suae. Famil. Lib. 14. Epist. 15.* 7

**S**I vales, bene est; ego valeo. Constitueramus, ut ad te antea scripseram, obviam Ciceronem Cæsari mittere. Sed mutavimus consilium, quia de illius adventu nihil audiebamus. De cæteris rebus, etsi nihil erat novi, tamen, quid velimus, & quid hoc tempore putemus opus esse, ex Sica poteris cognoscere. Tulliam adhuc mecum teneo. Valetudinem tuam cura diligenter. Vale. 12. Kal. Quintil.

*Tull. S. D. Ter. suae. Fam. lib. 14 Epist. 19.* 8

**I**N maximis meis doloribus excruciat me valetudo Tulliae nostræ. De qua nihil est quod ad te plura scribam. Tibi enim æque magnæ curæ esse certò scio. Quod me propius vultis accedere, video ita esse faciendum: etiam ante fecissem: Sed me multa impediunt, quæ ne nunc quidem expedita sunt. Sed à Pomponio expecto literas, quas ad me quamprimum perferendas cures velim. Da operam ut valeas.

*Tullius. S. D. Teren. suae. Famil. lib. 14. Epist. 12.* 9

**Q**UOD nos in Italiam salvos venisse gaudes, perpetuò gaudeas velim. Sed perturbati dolore animi, magnisque injuriis, metuo, ne id consilii ceperimus, quod non facile explicare possimus. Quare quantum potes nos adjuva. Quid autem possis, mihi in mentem non venit. In viam quod te des hoc tempore nihil est: & longum est iter, & non tutum: & non video quid prodesse possis, si veneris. Vale. Datum Pridie Nonas Novemb. Brundusio.

*Tull. S. D. Ter. suae. Fam. lib. 14. epist. 11.* 10

**S**I vales, bene est. Ego valeo. Tullia nostra venit ad me pridie idus Iunii, cujus summa virtute, & singulari humanitate, graviore etiam sum dolore affectus, nostra factum esse negigentia, ut longè alià in fortuna esset, atque ejus pietas ac dig-



LIBER PRIMVS.

dignitas postulabat. Nobis erat in animo Ciceronem ad Cæsarem mittere, & cum eo Cn. Salustium. Si profectus erit, faciam te certiolem. Valetudinem tuam diligenter cura. Vale. 17. Kalend. Quintil.

*Tull. & Cic. S. D. Tironi suo. Fam. lib. 16. Epi. 2. 11*

**S**Eptimum jam diem Corcyrae tenebamur, Qu. autem pater, & filius Buthroti. solliciti eramus de tua valetudine mirum in modum: Nec mirabamur nihil à te literarum. Iis enim ventis istinc navigatur, qui si essent, nos Corcyrae non \* sedere-  
mus. Cura igitur te, & confirma; & cum commodè & per valetudinem, & per anni tempus navigare poteris, ad nos amantissimos tui veni. Nemo nos amat, qui te non diligat. Charus omnibus expectatusque venies. cura ut valeas etiam atque etiam Tyro noster. Vale. 15. Kalend. Novemb. Corcyre.

(SEDEREMVS) Sedere est interdum nihil agere, sed morari, ut hic & apud Terentium. Sedere domi virginem tam grandem.

*Tullius. S. D. Teroni suo. Famil. 16. Epist. 4. 12*

**N**On queo ad te, nec lubet scribere, quo animo sim affectus: tantum scribo & tibi & mihi maximæ voluptati fore, si te firmum quamprimum videro. Tertio die abs te ad Alyzeam accesseramus. Is locus est citra Leucadem stadia 120. Leucade aut te ipsum aut tuas literas à Marione putabam me accepturum. Quantum me diligis, tantum fac ut valeas, vel quantum te à me scis diligi. Nonis Novembris. Alyzia.

*Cicero filius Tironi. S. D. Fam. lib. 16. Epist. 25. 13*

**E**T si iusta & idonea usus es excusatione intermissionis literarum tuarum, tamen id ne sæpius facias rogo. Nam etsi de republicâ rumoribus & nunciis certior fio, & de sua in me voluntate semper ad me perscribit pater, tamen de quavis minima re scripta à te ad me epistola semper fuit gratissima. Quare, cum in primis tuas desiderem literas, noli committere, ut excusatione potius expleas officium scribendi, quam assiduitate literarum. Vale.

*Cicero. S. D. Sulpitio. Fam. 13. 25. 14*

**H**Agasaretus Larissæus magnis meis beneficiis ornatus in consulatu meo, memor, & gratus fuit, meque postea



diligentissimè coluit. Eum tibi magnopere commendo: & ut hospitem, & familiare meum, & gratum hominem, & virum bonum, & principem civitatis suæ, & tua necessitudine dignissimum. Pergratum mihi feceris, si dederis operam, ut is intelligat hanc meam commendationem magnum apud te pondus habuisse. Vale.

*Cicero Trebatio. S. D. Fam. 7. 18.*

15

**E** Pistolam tuam quam accepi ab L. Aruntio conscidi innocentem: nihil enim habebat, quod non vel in concione rectè legi possit. sed & Aruntius ita te mandasse ai. bat, & tu adscripseras. Verùm illud esto, nihil te ad me postea scripsisse demiror, præsertim tam novis rebus. Vale.

*Cic. S. D. Q. Val. Legato. Procons. Fam. li. 13. Epist. 6*

16

**P**Ub. Cornelius qui tibi has literas reddidit, est mihi à P. Cuspio commendatus, cuius causa quantopere cuperem, deberemque profectò ex me facile cognovisti. Vehementer te rogo, ut cures, ut ex hac commendatione mihi Culpus quam maximas, quamprimùm, quàm sæpissimè gratias agat. Vale.

*Cic. S. D. Memmio. Fam. 13. 3.*

17

**A**ulum Fusium unum ex meis intimis observantissimum studiosissimumque nostri, eruditum hominem, & summa humanitate, tuaque amicitia dignissimum, velim ita tractes ut mihi coram recepisti. Tam mihi gratum id erit, quam quod gratissimum. Ipsum præterea summo officio & summa observantia tibi in perpetuum devinxis. Vale.

*Cicero S. D. Cornificio. Fam. 12. 27.*

18

**S**extus Aufidius, & observantia qua me colit, accedit ad proximos, & splendore equitis Romani nemini cedit. Est autem ita temperatis moderatisque moribus, ut summa severitas summa cum humanitate iungatur: cuius tibi negotia quæ sunt in Africa ita commendo, ut maiore studio, magisve ex animo commendare non possim. Pergratum mihi feceris si dederis operam, ut is intelligat meas apud te literas maximum pondus habuisse. Hoc te vehementer, mi Cornifici, rogo Vale.

*Cicero S. D. Basilio. Fam. lib. 6. Epist. 16*

19

**T**ibi gratulor: mihi gaudeo: te amo, tua tueor: à te amari, & quid agas, quidq, agatur certior fieri volo. Vale.

Plura



**S**I de tua in me voluntate dubitarem, multis à te verbis peterem, ut dignitatem meam tuerere: sed profecto est ita, ut mihi persuasi, me tibi esse curæ. Progreffus sum ad Inalpinos, cum exercitu, non tam nomen captans imperatorium, quam cupiens militibus satisfacere, firmosque eos ad tuendas nostras res afficere, quod mihi videor consecutus; nam & liberalitatem nostram, & animum sunt experti, cum omnium bellicosissimis bellum gessi, multa castella coepi, multa vastavi. Non sine causa ad Senatum literas misi. Adiuvam nos tua sententia, quod cum facies ex magna parte communi commodo inservieris. Vale.

*M. T. C. Servio Sulpitio. S. D. Fam. 13. 20.*

21

**A** Scapone Patrensi medico utor valde familiariter, eiusque cum consuetudo mihi iucunda fuit, tum etiam ars, quam sum expertus, in valetudine meorum, in qua mihi cum ipsa scientia, tum etiam fidelitate benevolentiaque satisfecit. Hunc igitur tibi commendo, & à te peto, ut des operam, ut intelligat diligenter me scripsisse de se, meamque commendationem usui magno sibi fuisse. Erit id mihi vehementer gratum. Vale.

*Cicero S. D. Appio Balbo. Fam. 10. 29.*

22

**D**E meo studio erga salutem & incolumitatem tuam credo te cognoscere ex literis tuorum: quibus me cumulatissime satisfecisse, certò scio: nec iis concedo, quanquam sunt singulari in te benevolentia, ut te salvum malint, quam ego, illi mihi necesse est concedant, ut tibi plus, quam ipsi hoc tempore prodesse possim: quod quidem nec destiti facere, nec desistam, & iam in maxima re feci, & fundamenta jeci salutis tuæ. Tu fac bono animo magnoque sis, meque tibi nulla re defuturum esse confidas. Prid. Nonas Quintil. Vale.

*Cicero S. D. Mario. Fam. 7. 4*

23

**A**D 8. Kal. Iul. in Cumanum veni cum Libone tuo, vel nostro porius: Pompejanum statim cogito: sed faciam te antecertio-rem. Tecum semper valere cupio, tum certè dum hic sumus. Vides enim quanto post una futuri sumus. Quare si quid constitutum cum podagra habes, fac in alium diem differas. Cura igitur ut valeas, & me hoc biduo aut triduo expecta. Vale.

*Cic.*



*Cic. Plauto Imp. Consul. Des. S. D. Famil. 10. Ep. 14.* 24

**O** Gratum famam, biduo ante victoriam, de subsidio tuo, de studio, de celeritate, de copiis, atque etiam hostibus fuis. Spes omnis in te est. Fugisse enim ex prælio Mutinensi dicuntur notissimi latronum duces. Est autem non minus gratum extrema delere, quàm prima depellere. Equidem expectabam jam tuas literas, idque cum multis, sperabamq; etiam Lepidum temporibus admonitum, tibi & reipublicæ satis esse facturum. In illam igitur curam incumbere mi Plance, ut ne qua scintilla teterrimi belli relinquatur: Quod si erit factum, & rempublicam divino beneficio affeceris, & ipse æternam gloriam consequere, 3. idus Maii. Vale.

*Cicero Papærio Pæto. S. D. Famil. 9. 23*

25

**H**eri veni in Cumanum: cras ad te fortasse: sed cùm certum sciam, faciam te paulò ante certiore. Etsi Marcus Cæparius, cum mihi in sylva \* Gallinaria obviam venisset, quæsissemque quid ageres, dixit te in lecto esse, quod ex pedibus laborares. Tuli scilicet molestè, ut debui: sed tamen constitui ad te venire, ut & viderem te, & viserem, & cœnarem etiam. Non enim arbitror coquum etiam te arthriticum habere. Expecta igitur hospitem cum minimè edacem, tum inimicum cœnis sumptuosus. Vale.

**GALLINARIA.** Varr. de re Rust. lib. 3. sylva Gallinaria, à gal-  
linis rusticis dicta in Mari Tusco, secundum Italiam, contra mon-  
tes Liguricos. Strabo lib. 5.

*Cicero S. D. Plancio Fam. 4. 15.*

26

**A**ccepi per breves tuas literas: quibus id quod scire cupiebam, cognoscere non potui: cognovi autem id quod mihi dubium non fuit. Nam quàm fortiter ferres communes miseria, non intellexi: quàm me amares facile perspexi. Sed hoc scieram: illud si scissem, ad id meas literas accommodassem. Sed tamen etsi antea scripsi quæ existimavi scribi oportere, tamen hoc tempore breviter te commonendum putavi, ne quo in periculo te proprio existimares esse. In magno omnes, sed tamen in communi sumus. Quare non debes aut propriam fortunam & præcipuam postulare, aut communem recusare. Quapropter eo animo finis inter nos quo semper fuimus: quod de te sperare, de me præstare possum. Vale.

*Cic. Do.*



LIBER PRIMVS.

*C. Dolabellæ S. D. Fam. 9. 12.*

27

**G**Ratulor Baiis nostris, siquidem, ut scribis, salubres repen-  
tè factæ sunt; nisi fortè te amant, & tibi assentantur, &  
tamdiu, dum tu ades, sint oblitæ sui. Quod quidem si ita est,  
minimè miror, coelum etiam & terras vim suam, si tibi ita con-  
veniat, dimittere. Oratiunculam pro Deiotaro, quam requi-  
rebas, habebam mecum, quod non putâram. Itaque eam tibi  
misi. Velim sic legas, ut causam tenuem, & inopem, nec scripti-  
one magnopere dignam. Sed ego hospiti veteri & amico mu-  
nusculum mittere volui \* levidensæ, crasso filo, cujusmodi  
ipsius solent esse munera. Tu velim animo sapienti, fortique  
sis, ut tua moderatio & gravitas aliorum infamet injuriam.  
Vale.

LEVIDENSAE. adjectivum legendum: Sic Isidorus; Et contra-  
riam ponit Pavidensam vestem, quæ graviter dentata & calcata  
sit; sicut prior leviter densata.

*C. Imper. Marc. Cælio Aedili Curuli. Fam. S. D. 2. 14.*

28

**F**Abio viro optimo, & homine doctissimo, familiarissimè utor,  
mirificeque eum diligo, cùm propter summum ingenium  
eius summamque doctrinam, tum propter singularem mode-  
stiam. Eius negotium sic velim suscipias, ut si res esset mea.  
Novi ego vos magnos patronos. \* Hominem occidat oportet,  
qui vestra opera uti velit. Sed in hoc homine nullam accipio  
excusationem. Omnia relinques si me amabis, cum tua opera  
Fabius uti volet. Ego res Romanas vehementer expecto &  
desidero: imprimisque quid agas scire cupio. Nam tamdiu  
propter hyemis magnitudinem nihil novi ad nos afferebatur.  
Vale.

HOMINEM OCCIDAT. Iocatur cum laude Cælii: solent enim  
magni patroni graves tantum causas recipere.

*Cicero Trebatio S. D. Fam. 7. 22.*

29

**I**lluferas heri inter \* scyphos, quod dixeram controversiam  
esse, possetne hæres, quod furtum antea factum esset, recte  
furti agere. Itaque etsi domum \* bene potus, seroque redie-  
ram, tamen id caput ubi hæc controversia est, notavi, & de-  
scriptum tibi misi: ut scires, id quod tu neminem sensisse dice-  
bas, Sextum Ælium, M. Manilium, M. Brutum sensisse. Ego  
tamen Scævolæ & Testæ assentior.

SCYPHOS.



(SCYPHIS.) Scyphus Vas potorium fuit. Tibul.

*Adstabat cum Scyphus ante dapes.*

(BENE POTVS.) Pro valde: sic bene nummatus. Horat.

*Cicero S. D. Bruto Imper. Fam. II. 15.*

30

**E**T si mihi tuæ literæ iucundissimæ sint tamen iucundius fuit, quod in summa occupatione tua Planco Collegæ mandasti, ut te mihi per literas excusaret, quod fecit ille diligenter, mihi autem nihil amabilius officio tuo & diligentia. Coniunctio tua cum collega, concordiaque vestra, quæ literis communibus declarata est. S. P. Q. R. gratissima accidit. Quod superest, perge mi Brute, & iam non cum aliis, sed tecum ipse certa. Plura scribere non debeo, præsertim ad te quo magistro brevitatis uti cogito. Literas tuas vehementer exspecto, & quidem tales quales maximè opto. Vale.

*Cic. S. D. Fursano Proconsul. Fam. 6. 9.*

31

**C**UM A. Cecina tanta mihi familiaritas consuetudoque semper fuit, ut nulla maior esse possit. Nam & patre eius claro homine, & forti viro plurimum usi sumus, & hunc à pucro, quod & spem mihi magnam afferebat, summæ probitatis, summæque eloquentiæ, & vivebat mecum coniunctissimè, non solum officiis amicitiae, sed etiam studiis communibus, sic semper dilexi, ut non ullo cum homine coniunctius viverem. Nihil attinet me plura scribere; quàm mihi necesse sit eius salutem, & fortunas, quibus cunque rebus possim tueri vides. Reliquum est, ut cum cognòrim pluribus rebus, quid tu, & de bonorum fortuna, & de Reip. calamitatibus sentires, nihil à te petam nisi ut ad eam voluntatem, quam tua sponte erga Cecinam habiturus esses, tantus cumulus accedat commendatione mea, quanti me à te fieri intelligo. Hoc mihi gratius facere nihil potes. Vale.

*Cic. Cornificio Collegæ. S. D. Fam. 12. 20.*

32

**G**RATÆ mihi tuæ literæ nisi quod Sinuessanum diversorium contempsisti. Quam quidem contumeliam villa pusilla iniquo animo feret, nisi in Cumano & Pompeiano reddideris \* *παραπεριπαυτων* omnia de omnibus. Sic igitur facies, meque amabis, & scripto aliquo laceesses. Ego enim respondere facilius possum, quam provocare. Quod si, ut es, \* cessabis, lacessam, nec tua inertia etiam ignaviam afferet. Plura otiosus

sus



us. Hæc cùm essem in senatu, exaravi. Vale.

PANTA) Plenam hæc verba compensationem significant:  
sic Lib. 15 Epist. 7. (V T E S.) Quæ tua est consuetudo.

Cicero Cornificio. S. D. Fam. 12. 21,

33

**C**Aiu Anitius familiaris meus, vir omnibus rebus ornatus, negotiorum suorum causa legatus est in Africam\* legatione libera. eum velim rebus omnibus adiuves, operamque des, ut quàm commodissimè sua negotia conficiat. Imprimis, quæ quod ei charissimum est, dignitatem eius tibi commendo. Idque à te peto, quod ipse in provincia facere sum solitus non rogatus ut omnibus senatoribus lictores darem: quod idem acceperam, & cognoveram à summis viris factitatum. Hoc igitur mi Cornifici facies, cæterisque rebus omnibus eius dignitati, reique, si me ames, consules. Id erit mihi gratissimum. Da operam ut valeas.

LEGATIO LIBERA. Senatoribus ad sua negotia proficiscentibus concedi solita est: sine onere & negotio.

Cicero S. D. Cassio. Fam. 12. 9.

34

**B**revitas tuarum literarum me quoque breviorē in scribendo facit: & verè ut dicam, non satis occurrit quod scribam. Nostras enim res in actis perferri ad te certo scio: Tuas autem ignoramus, tanquam enim clausa sit Asia, sic nihil perferretur ad nos, præter rumores de oppresso Dolabella, satis illos quidem constantes, sed adhuc sine autore. Nos confectum bellum cum putaremus, repentè à Lepido tuo in summam sollicitudinem adducti sumus. Itaque persuade tibi maximam Reip. spem in te, & in tuis copiis esse. Firmos omninò exercitus habemus: sed tamen ut omnia, ut spero, prosperè procedant, multum interest te venire. Exigua est enim spes Reip. nam nullam non libet dicere, sed quæcunque est ea despondetur anno consularis tui. Vale.

Tul. & Cic. si. & Q S. D. T. humanis. & opt. Fam. 16. 1. 35

**V**ide quanta in te sit suavitas, duas horas Thyrei fuimus: Xenomenes hospes te tam diligit, quam si vixerit tecum. Is omnia pollicitus est, quæ tibi essent opus: Facturum puto. mihi placebat, si firmior esses, ut te Leucadem deportares, ut ibi te planè confirmares, Videbis, quid Curio, quid Lysoni, quid medico placeat. Volebam ad te Marionem remittere quem?



LIBER PRIMVS.

quem, cum meliusculé tibi esset, ad me mitteres. Sed cogitavi  
 unas literas Marionem afferre posse, me autem crebras expecta-  
 re. Poteris igitur, & facies, si me diligis, ut quotidie sit Acastus  
 in portu. Multi erunt, quibus recte literas dare possis, qui ad  
 me libenter perferant. Equidem Patras euntem neminem præ-  
 termittam. Ego omnem spem tui diligenter curandi in Curio  
 habeo. Nihil potest illo fieri humanius, nihil nostri amantius.  
 Ei te totum trade. Malo te paulo post valentem, quàm statim  
 imbecillum videre. Cura igitur nihil aliud, nisi ut tu valeas.  
 Cætera ego curabo. Etiam atque etiam vale. Leucade profici-  
 scens. 7. Id Novemb.

*Tull. & Cic. & Quint. Tironi. Fam. 16. 7.*

36

**T**ertiam ad te hanc epistolam scripsi eadem die, magis in-  
 stituti mei tenendi causa, quia nactus eram cui darem,  
 quam quod haberem quid scriberem. Igitur illa: Quantum me  
 diligis, tantum adhibe in te diligentię. Ad tua innumerabilia  
 in me officia adde hoc, quod mihi erit gratissimum omnium:  
 cum valetudinis rationem, ut spero, habueris, habeto etiam na-  
 vigationis. In Italiam euntibus ad me literas dabis, ut ego e-  
 untem Patras neminem prætermitto. Cura, cura te mi Tiro.  
 Quando non contigit, ut simul navigares, nihil est quod festi-  
 nes: nec quicquam cures, nisi ut valeas. Etiam atque etiam va-  
 le. 7. Idus Novemb. Actio. vesperi.

*Tullius Tironi S. D. Fam. 16. 12.*

37

**E**go vero cupio te ad me venire: sed viam timeo. Gravissi-  
 mē ægrotasti: inedia, & purgationibus, & vi ipsius morbi  
 consumptus es. Graves solent offensiones esse ex gravibus mor-  
 bis, si qua culpa commissa est. Iam ad idbiduum, quod fueris  
 in via, dum in Cumanum venis, accedent continuo ad redi-  
 tum dies quinque. Ego in Formiano ad 3. Kalend. esse volo.  
 ibite ut firmum offendam, mi Tiro, effice. Literulæ meæ,  
 siue nostræ, tui desiderio oblanguerunt. Hæc tamen epistola  
 quam Acastus attulit, oculos paululum sustulerunt. Pom-  
 peius erat apud me cum hæc scribebam. Hilarē & liben-  
 ter ei cupienti audire nostra, dixi, sine te omnia mea  
 muta esse. Tu musis nostris para, ut operas reddas. Nostra

ad



LIBER PRIMVS.

ad diem dictam fient. Docui enim te, *Fides* \* *esum* quod haberet. Fac planè ut valeas: nos ad summum. Vale. 14. Kalend. Ianuar.

(NOSTRA.) Quæ me tibi facturum promisi. Manumissionem significat. (NOTATIONEM) *Fides* inde dicta est, quod id fiat, quod promissum est.

*Cicero. S. D. Curioni. Fam. lib. 2. Epist. 4.*

38

**E**pistolarum genera multa esse non ignoras, sed unum illud certissimum, cujus causa inventa res ipsa est, ut certiores faceremus absentes, si quid esset quod eos scire, aut nostra, aut ipsorum interesset. Hujus generis literas à me profecto non expectas: domesticarum enim rerum tuarum habes & scriptores, & nuncios: In meis autem rebus nihil est sane novi. Reliqua sunt Epistolarum genera duo, quæ me magnopere delectant; unum familiare, & jocosum alterum; severum, & grave. Utro me minus deceat uti, non intelligo. Iocerne tecum per literas? civem mehercule non puto esse, qui temporibus his ridere possit. An gravius aliquid scribam? quid est quod possit graviter scribi à Cicerone ad Curionem, nisi de Repub? Atque in hoc genere hæc mea causa est, ut neque ea quæ nunc sentio velim scribere. Quamobrem, quoniam mihi nullum scribendi argumentum relictum est, utar ea clausula qua soleo, teque ad studium summæ laudis cohortabor. Est enim tibi gravis adversaria constituta & parata, incredibilis quædam expectatio: Quam tu una re facillimè vinces, si hoc staveris, quarum laudum gloriam adamâris, quibus artibus ex laudes comparantur, in iis esse elaborandum. In hanc sententiam scriberem plura, nisi te tua sponte satis incitatum esse considerem: & hoc, quicquid attigi, non feci inflammandi tui causa, sed testificandi amoris mei. Vale.

*Cicero. S. D. Bruto. Fam. 13. 14.*

39

**L**. Titio Strabone, Equite Romano in primis honesto & ornato, familiarissime utor. Omnia mihi cum eo intercedunt jura summæ necessitudinis. Huic in tua provincia pecuniam debet. P. Cornelius Ea res à Volcatio, qui Romæ jus dicit, rejecta in Galliam est. Peto à te hoc diligentius, quam si mea res esset, quo est honestius de amicorum pecunia



LIBER PRIMVS.

nia laborare, quàm de sua, ut negotium conficiendum cures, ipse sulcipias, transigas, operamque des, ut quod tibi æquum & rectum videbitur, ut quàm commodissima conditione libertus Strabonis, qui eius rei causa missus est, negotium conficiat, ad nummosque perveniat. Id & mihi gratissimum erit: & tu ipse L. Titium cognosces amicitia tua dignissimum. Quod ut tibi curæ sit, ut omnia solent esse, quæ me velle scis, te vehementer etiam atque etiam rogo. Vale

*Cic. S. D. T. Fam. lib. 5. Epist. 18*

40

**E**T si egomet, qui te consolari cupio, consolandus ipse sum, propterea quod nullam rem gravius iam diu tuli quàm incommodum tuum: tamen te magnopere, non horror solùm, sed etiam pro amore nostro rogo atque oro, te colligas, virumque præbeas, & qua conditione omnes homines, & quibus temporibus nati sumus, cogites. Plus tibi virtus tua dedit, quam fortuna abstulit, propterea quod adeptus es quod non multi homines novi; amisisti quod plurimi homines nobilissimi. Ea denique videtur conditio impendere legum, iudiciorum, temporum, ut optimè actum cum eo videatur esse, qui quam levissima poena ab hac Repub. discesserit. Tu vero qui & fortunas & liberos habebas, & nos, cæterosque, necessitudine & benevolentia tecum coniunctissimos, quique magnam facultatem sis habiturus nobiscum & cum omnibus tuis vivendi, & cum unum sit iudicium ex tam multis, quod repræhendatur, idque una sententia, eaque dubia, potentiæ alicuius condonatum existimetur, omnibus his de causis, debes istam molestiam quam levissimè ferre. Meus animus erit in te liberosque tuos semper, quem tu esse & vis, & qui esse debet Vale.

(NOVI.) Novus homo & nobilis opponuntur. Non autem nobilis & plebeius, quia plerique plebei etiam claris maioribus orti. Novus homo qui maiores nullos ante se claros numerare possit, & ipse suæ fortunæ & existimationis faber est. Paul. Man. Lib. 1, 7. Epist. Famil.

*Cicero S. D. Trebiano. Fam. 6. 11.*

41

**D**Olbellam antea tantum modo diligebam, obligatus ei nihil eram: nec enim acciderat mihi opus esse: & ille mihi debebat, quod non defueram eius periculis. Nunc tanto sum devinctus eius beneficio, quod & antea in re, & hoc tempore in salute tua cumulativè mihi satisfecit, ut nemini plus debeam



am. Qua in re gratulor tibi ita vehementer, ut te quoque mihi gratulari, quàm gratias agere, malim: alterum omninò non desidero, alterum verè facere poteris. Quod reliquum est: quando tibi virtus, & dignitas tua reditum ad tuos aperuit, est tuæ sapientiæ, magnitudinisque animi, quid amiseris, oblivisci, quid recuperaveris cogitare. Vives cum tuis, vives nobiscum. Plus acquisivisti dignitatis, quam amisisti rei familiaris: quæ ipsa tum esset jucundior, si ulla res esset publica. Vestorius noster familiaris ad me scripsit, te mihi maximas gratias agere. Hæc prædicatio tua mihi valdè grata est: eaque te uti facile patior, cum apud alios, tum mehercule apud Sironem nostrum amicum. Quæ enim facimus, ea prudentissimo cuique maximè probata esse volumus. Te cupio videre quamprimum. Vale.

*Cicero Trebatio. S. D. Fam. 7. 15.*

42

**C**hrysippus Vettius, Cyriarchi tecti libertus fecit, ut te non immemorem putarem mei: salutem enim mihi verbis tuis nunciavit. Valdè jam lautus es, qui gravere literas ad me dare, homini præsertim prope domestico. Quod si scribere oblitus es, minus multi jam te advocato causa cadent. Sin nostri oblitus es, dabo operam, ut istuc veniam antequam planè ex animo tuo effluam. Sin æstivorum timor te debilitat, aliquid excogita, ut fecisti de *Britannia*. Illud quidem perlibenter audivi ex eodem Chrysippo, te esse Cæsari familiarem, sed mehercule mallem id quod erat æquius, de tuis rebus, ex tuis literis quàm sæpissimè cognoscere, quod certe ita fieret, si tu maluisses benevolentia quam litium iura perdiscere. Sed hæc iocati sumus & tuo more, & non nihil etiam nostro. Te valdè amamus, nosque à te amari cum volumus, tum etiam confidimus. Vale.

*Tullius Cassio S. D. Fam. 12. 8.*

43

**S**celus affinis tui Lepidi, summamque levitatem, & inconstantiam, ex actis quæ ad te mitti certò scio, cognoscere te arbitror. Itaque nos, confecto bello, ut arbitrabamur, renovatum bellum gerimus: spemque omnes in D. Bruto, & Planco habemus: si verum quæris, in te & in meo Bruto, non solum ad præsens perfugium, si, quod nolim, adversi quid acciderit, sed



sed etiam ad confirmationem perpetuæ libertatis. Nos hic de Dola bella audiebamus quæ vellemus: sed certos autores non habebamus. Te quidem magnum hominem & præsentî iudicio, & reliqui temporis expectatione scito esse. Hoc tibi proposito, fac ut ad summa contendas. Nihil est tantum, quod non populus Romanus à te perfici atque obtineri posse iudicet. Vale.

SCELVS. Quia se cum Antonio conjunxit.

CONFECTO. Victo ad Mutinam Antonio.

*Cicero S. D. Marco Lepido. Fam. 10. 27.*

44

**Q**Uod mihi pro mea summa erga te benevolentia magnæ curæ est, ut quam amplissima dignitate sis, molestè tuli, te senatui gratias non egisse, cum esses ab eo ordine ornatus \* summis honoribus. Pacis inter cives conciliandæ te cupidum esse, lætor. Pacem eam si à servitute sejungis, consules & reipublicæ & dignitati tuæ: sin ista pax perditum hominem in possessionem impotentissimi dominatus restitutura est: hoc animo scito esse omnes sanos, ut mortem servituti anteponant. Itaque sapientius, meo quidem iudicio, facies, si te in istam pacificationem non interpones, quæ neque senatui, neque populo, neque cuiquam bono probatur: sed hæc audies ex aliis, aut certior fies literis. Tu pro prudentia, quid optimum factu sit, videbis. Vale.

SVMMIS HONORIBVS. Supplicatione illi decreta, & postea concessio triumpho; & statua equestri inaurata.

*Cic. Planc. Imper. Cos. Des. S. D. Fam. lib. 10. 2.*

45

**M**Eum studium honori tuo pro necessitudine nostra non defuisset, si aut tutò in senatum, aut honeste venire potuissem. Sed nec sine periculo quisquam libere de re publica sentiens versari potest in summa impunitate \* gladiatorum: nec nostræ dignitatis videtur esse, ibi sententiam de re publica dicere, ubi me & meliùs & propiùs audiant armati, quàm senatores. Quapropter in privatis rebus nullum neque officium, neque studium meum desiderabis: ne in publicis quidem, si quid erit, in quo me interesse necesse sit, nunquam deero, ne cum periculo quidem meo, dignitati tuæ. In iis autem rebus quæ nihilominus ut ego absim, confici possunt, peto à te, ut me rationem habere velis & salutis, & dignitatis meæ. Vale.

GLA-



**T** Amen à malitia non discedis. Tenuiculo apparatu significas Balbum fuisse contentum. Hoc videris dicere: quum  
 \* Reges tam sint continentes, multo magis consulares esse oportere. Nescis me ab illo omnia expilcatum? recta enim à porta domum meam venisse: neque hoc admiror, quod non ad tuam potius: sed illud, quod nec ad suam. Ego autem tibi primis verbis, Quid noster Pætus? At ille adiurans, nusquam se unquam libentius. Hoc si verbis assecutus es, aures ad te afferam non minus elegantes: sin autem obsonio, peto à te ne plures esse \* Balbos, quam disertos putes. Me quotidie aliud ex alio impedit. Sed si me expediero ut in ista loca venire possim, non committam, ut te scrò à me certiore factum putes. Vale.

REGES. Quia potentissimus erat apud Cæsarem Balbus, ideo loquitur de eo quasi Rex fuisset.

BALBOS. Ambiguitate vocis ludit, est enim proprium viri, & eum notat qui linguæ vitio parum expedite loquitur.

**S**i vales, bene est. Athenas veni ad 2. Kalend. Iunii, atque ibi, quod maximè optabam, vidi filium tuum, deditum optimis studiis, summaque modestiæ fama. Qua ex re quantam voluptatem ceperim, scire potes, etiam me tacente. Non enim nescis, quanti te faciam, quam pro nostro veterrimo, verissimoque amore omnibus tuis etiam minimis commodis, non modo tanto bono, gaudeam. Noli putare, mi Cicero, me hoc auribus tuis dare. Nihil adolescente tuo, atque adeo nostro (nihil enim mihi à te potest esse sejunctum) aut amabilius omnibus iis qui Athenis sunt, est, aut studiosius earum artium, quas tu maxime amas, hoc est optimarum. Itaq; tibi, quod verè facere possum, libenter quoque gratulor, nec minus etiam nobis, quod eum, quem necesse erat diligere qualiscunque esset, talem habemus, ut libenter quoque diligamus. Qui cum mihi in sermone iniecisset se velle Asiam visere, non modo invitatus, sed etiam rogatus est à me, ut id potissimum nobis obrinen-

B

tibus



LIBER PRIMVS

tibus provinciam faceret. Cui nos & charitate, & amore tuum officium præstatu-  
ros non debes dubitare. Illud quo-  
que erit nobis curæ, ut Cratippus unâ cum eo sit, ne putes  
in Asia feriaturum illum ab iis studiis, in quæ tua cohortatione  
incitatur, futurum. Nam illum paratum, ut video, & ingres-  
sum \* pleno gradu, cohortari non intermittemus, quo indies  
longius discendo exercendoque se proceat. Vos quid egeri-  
tis in Repub., cum has literas dabam, non sciebam. Audiebam  
turbulenta: quæ scilicet cupio esse falsa, ut aliquando otiosa li-  
bertate fruamur, quod vel minimè mihi adhuc contigit. Ego  
tamen nactus in navigatione nostra pusillum laxamenti, con-  
cinnavi tibi munusculum ex instituto meo, & dictum, cum  
magno nostro honore à te dictum, conclusi, & tibi infra sub-  
scripsi. In quibus versiculis si tibi quibusdam verbis <sup>ut supra</sup>  
quædam <sup>liberior</sup> in loquendo videbor, turpitudinem \* personæ e-  
ius, in quem liberius invehimur, nos vindicabit. Ignosces eti-  
am iracundiæ nostræ quæ iusta est in eiusmodi & homines, &  
cives. Deinde, qui magis hoc Lucilio licuerit assumere liber-  
ratis, quàm nobis? Qui etiam si odio par fuerit, in eos quos  
laesit, tamen certè non magis dignos habuerit, in quos tanta li-  
bertate verborum incurreret. Tu, sicut mihi pollicitus es, ad-  
iunges me quaprimùm ad tuos sermones. Namque illud non  
dubito, quin si quid de interitu Cæsaris scribas, non pariaris  
me minimam partem & rei & amoris tui ferre. Vale, & ma-  
trem meosque tibi commendatos habe. 8. Kal. Iun. Athenis.

PLENOGRADV. Intenso & modice a cursu distante. Salust. Mi-  
lites pleno gradu in collem subducit. PERSONAE. M. Antonii

Cicero Curio. S. D. Fam. 7. 31.

48

**F**Acile perspexi ex tuis literis (quod semper studui) & me  
à te plurimè fieri, & te intelligere quàm mihi charus esses.  
Quod quando uterque nostrum consecutus est, reliquum est,  
ut officiis certemus inter nos: quibus æquo animo vel vincam  
te, vel vincar abs te. Acilio non fuisse necesse meas dari li-  
teras, facile patior. Sulpitii tibi operam, intelligo ex tuis  
literis non multum opus fuisse, propter res tuas, ita con-  
tractas, ut, quemadmodum scribis, nec caput, nec pedes.  
Equidem vellem uti pedes haberent, ut aliquando redires.

Vides



LIBER PRIMVS.

Vides enim exaruisse iam veterem urbanitatem, ut Pomponius noster suo jure possit dicere, Nisi nos pauci retineamus gloriam antiquam Atticam. Ergo is tibi, nos ei succedendus. Veni igitur, quæso, ne tantum iemen urbanitatis una cum Repub. intereat. Vale.

*Cic. Acilio Procos. S. D. Fam. 13. 32.*

49

**I**N Alesina civitate tam lauta, quam nobili, conjunctissimos habeo, & hospitio, & familiaritate M. & C. Clodios, Archagathum, & Philonem. sed vereor, ne, quia complures tibi præcipue commendo, ex æquare videar ambitione quadam commendationes meas: quanquam à te quidem cumulate factis sit, & mihi, & meis omnibus. Sed velin sic existimes, hanc familiam & hos mihi maxime esse conjunctos vetustate, officiis, benevolentia. Quamobrem peto à te maiorem in modum, ut his omnibus in rebus, quantum tua dignitas, fidesque patietur, commodes. Id si feceris, erit mihi vehementissimè gratum. Vale.

*Cic. Acilio. Proc. S. D. Fam. lib. 13. Epist. 33.*

50

**C**N. Otacilio Nasone utor familiarissime, ita prorsus, ut illius ordinis nullo familiarius. Nam & humanitate eius, & probitate in consuetudine quotidiana magnopere delector. Nihil jam opus est expectare te, quibus eum verbis tibi commendem, quo sic utor, ut scripsi. Habet is in provincia tua negotia, quæ procurant liberti Hilarius, Antigonus, Demonstratus: quos tibi, negotiaque omnia Nasonis, non secus commendando, ac si mea essent. Gratissimum mihi feceris, si intellexero hanc commendationem magnum apud te pondus habuisse. Vale.

*Cic. S. D. Acilio. Proc. Fam. 13. 34.*

51

**A**Vitum mihi hospitium est cum Lyfone Lysonis filio Lilybatano, valdeque ab eo observor, cognovique dignum & patre & avo; est enim nobilissima familia. Quapropter commendando tibi maiorem in modum rem domumque eius: Magnoque opere à te peto cures, ut intelligat meam commendationem maximo sibi apud te & adjumento, & ornamento fuisse. Vale.

*Cic. Acilio Procos. S. D. Fam. 13. 35.*

52

**C**Aius Avianus Philoxenus antiquus est hospes meus. & præ-



LIBER PRIMVS.

& præter hospitium, valde etiam familiaris: quem Cæsar meo  
\* beneficio in \* Novocomenses retulit. Nomen autem Aviani  
consecutus est, quod homine nullo plus est usus, quam Flacco  
Aviano, meo (quemadmodum te scire arbitror) familiarissimo.  
Quæ ego omnia collegi, ut intelligeres, non vulgarem esse  
commendationem hanc meam. Peto igitur abs te, ut omnibus  
rebus, quod sine molestia tua facere possis, ei commodes, ha-  
beasque in numero tuorum; perficiasque ut inte'ligat has li-  
teras meas magno sibi usui fuisse. Erit id mihi maiorem in mo-  
dum gratum Vale.

MEO BENEF. Meo rogatu. IN NOVOCOMENS. Inter eos  
quos Novumcomum deductos civitate donavit: ii fuere quinque  
millia, & Græci maxime illustres quingenti. Philoxenus autem  
Græcus quia Siculus.

*Cic. Plan. Imper. Cos. Des. S. D. Fam. 10. 13.*

53

**V**T primum potestas data est aug. ndæ dignitatis tuæ, nihil  
prætermisi in te ornando, quod positum esset, aut in præ-  
mio virtutis, aut in honore verborum. Id ex ipso senatus con-  
sulto poteris cognoscere: ita enim est perscriptum, ut à me de-  
scripto dicta sententia est, quam senatus frequens secutus  
est summo studio, magnoque consensu. Ego, quanquam ex tuis  
literis, quas mihi misisti, perspexeram te magis iudicio bono-  
rum, quam insignibus gloriæ delectari: tamen considerandum  
nobis existimavi, etiam si tu nihil postulares, quantum tibi à  
Repub. deberetur. Tu contexes extrema cum primis. Qui  
enim M. Antonium oppresserit, is bellum confecerit. Itaque  
Homerus non Aiace, nec Achillem, sed Vlysssem appellavit

\* Πτολιπόρθον.

Ptoliporthon. Urbis vastatorem. Vlysses etenim sua astutia Tro-  
iano bello finem fecit.

*Cic. C. Cassio S. D. Fam. lib. 12. Epist. 6*

54

**Q**VI status rerum fuerit tum, cum has literas dedi; scire  
poteris ex C. Tidio Strabone, viro bono, & optimè de  
Repub. sentiente. Nam quid dicam cupidissimo tui,  
qui domo & fortunis relictis, ad te potissimum profectus  
sit? Itaque eum tibi nec commendo quidem: adventus ipsi-  
us ad te satis eum commendabit. Tu velim sic existimes,  
utique persuadeas, omne perfugium bonorum in te, & Bru-

to



Bruto esse positum, si, quod nolum, adversi quid evenerit. Res cum hæc scribebam, erat in extremum deducta discrimen. Brutus enim Mutinæ vix jam sustinebat, qui si conservatus erit, vicinus: sin (quod Dii omen avertant) omnis omnium cursus est ad vos. Proinde fac tantum animum habeas, tantumq; apparatus, quanto opus est ad universam rempublicam recuperandam. Vale.

*Cic. S. D. Cornif. Coll. Fam. 12. 17.*

55

**G**RATA mihi vehementer est memoria nostri tua, quam significasti literis: quam ut conserves, non quod de tua constantia dubitem, sed quia mos est ita rogandi, rogo. Ex \* Syria nobis tumultuosiora quædam nuntiata sunt: quæ, quia tibi sunt propiora quam nobis, tua me causa magis movent quam mea. Romæ summum otium est, sed ita, ut malis salubre aliquod & honestum negotium: quod spero fore, quia video id curæ esse Cæsari. Me scito, dum tu absis, quasi occasionem quandam, & licentiam nactum, scribere audacius, & cætera quidem fortasse, quæ etiam tu concederes: sed proximi nē scripsi de optimo genere dicendi, in quo sæpè suspicatus sum te à iudicio nostro, sic scilicet ut doctum hominem à non indocto, paulum diffidère. Huic tu libro maximè velim ex animo, si minus, gratiæ causa, suffragère. Dicam tuis, ut eum, si velint, describant, ad teque mittant. Puto enim, etiam si rem minus probabis, tamen in ista solitudine quicquid à me profectum sit, jucundum tibi fore. Quòd mihi existimationem tuam, dignitatemque commendas, facis tu quidem, omnium more: sed velim sic existimes, me, cum amorì, quem inter nos mutuum esse intelligam, plurimum tribuere, tum de summo ingenio, & de optimis tuis studiis, & de spe amplissimæ dignitatis tuæ ita judicare, ut neminem tibi antepōnam, comparem paucos. Vale.

EX SYRIA. Seditionem fecit Q. Cæcilius Bassus, qui postea se Cæsario tradidit, & legionem suam. Dio. lib. 47.

*Cic. S. D. Thermo Propræt. Fam. 13. 54.*

99

**C**UM mihi multa grata sunt, quæ tu adductus mea commendatione fecisti, tum imprimis, quod M. Marcilium, amici atque interpretis mei filium, liberalissimè tracta-



## LIBER SECVNDVS.

tractavisti. Venit enim Laodiceam, & tibi apud me, mihi que propter te maximas gratias egit. Quare quod reliquum est, à te peto, quando apud gratos homines beneficium ponis, ut eo libentius his commodes: operamque des, quoad fides tua patietur, ut socrus adolescentis rea ne fiat. Ego cum antea studiosè commendabam Marcilium, tum multo nunc studiosius, quod in longa \* apparitione singularem & propè incredibilem patris Marcilii fidem, abstinentiam, modestiamque cognovi. Vale.

APPARITIONE. Qui præibant Magistratibus apparitores dicebantur. Apparitio est munus ipsum. Apparitores erant scribæ, accensi, lictores, viatores, præcones; &c.

## LIBRI PRIMI FINIS.



## LIBER SECVNDVS

*Cicero Attico S. D. Ad Atticum. lib. 3. Epist. 27.*

**E**X tuis literis, & ex re ipsa, nos funditus periisse video. Te oro, ut quibus in rebus mei tui indigebunt, nostris miseriisne desis. Ego te, ut scribis, citò videbo; plura non scribo. Cura ut valeas.

*Cic. Att. S. D. ad Att. 3. 21.*

**T**riginta dies erant \* ipsi, cum dabam has literas, per quos nullas à vobis acceperam. Mihi autem erat in animo jam, ut ante ad te scripsi, ire in Epeirum, & ibi omnem casum potissimum expectare. Te oro, ut si quid erit quod perspicias, quamcunque in partem, quam planissimè ad me scribas, & meo nomine (ut scribis) literas quibus putabis opus esse, ut des. Vale Quint. Kalend. Novembr.

TRIGINTA DIES ERANT IPSI. Usitata locutio scriptoribus: id est integri & plani: hoc est, planè triginta dies: Lib. 2. Famil. Epist. 8. Ego cum Athenis decem ipsos dies fuisset.

*Cicero*



**E**GO quod, per Thesaliam firem in Epeirum, per diu nihil eram auditurus, & quod mei studiosos habeo Dyrrhachinos, ad eos perrexi, cum illa superiora Thessalonicae scripsissem: inde cum ad te me convertam, faciam ut scias: tuque ad me velim omnia quam diligentissime, \* cuiusmodi sunt, scribas. Ego jam aut rem, aut ne spem quidem expecto. Vale. Kal. Decemb. Dyrrhachii.

**CVICVIMODI.** Sive laeta sive tristitia: saepe recepta vox Agel. lib. 9. cap. 2. Vide authores linguae Latinae. Sic Terent. Cuius. Alii Cic. Cuiuscunque modi. Auson. Popma. 1. lib. 2. cap. 7. de usu Antiquae Locu.

*Cicero Attico S. D. A. 3. 4.*

**C**UM antea maxime nostra interesse arbitrabar, te esse nobiscum; tum vero ut legi \* rogationem, intellexi ad iter quod constitui, nihil mihi optatius cadere posse, quam ut tu me quamprimum consequare: ut, cum ex Italia profecti essemus, sive per Epeirum iter esset faciendum, tuo tuorumque praesidio uteremur, sive aliud quid agendum esset, certum consilium de tua sententia capere possemus. Quamobrem te oro, des operam ut me statim consequare. Facilius potes, quoniam de provincia Macedonia perlata lex est. Pluribus verbis tecum agerem, nisi pro me apud te res ipsa loqueretur. Vale.

**ROGATIONEM.** Intelligit Clodium, ne intra 400. milliaria ad Romam esset aut maneret Cicero.

*Cic. Att. S. D. Att. lib. 3. Epist. 2.*

**I**Tineris nostri causa fuit, quod non habebam locum, ubi pro meo jure diutius esse possem, quam in fundo Sicæ, praesertim nondum rogatione correctâ: & simul intelligebam, ex eo loco, si te haberem, posse me Brundisium referre: sine te autem non esse nobis illas partes tenendas propter \* Autronium. Nunc, ut ad te antea scripsi, si ad nos veneris, consilium totius rei capiemus. Iter esse molestum scio, sed tota calamitas omneis molestias habet. Plura scribere non possum, ita sum animo perculso, & abiecto. Cura ut valeas. Dat. 6. Id. Apr. in oris Lucaniae.

**AVTRONIVS.** Hic erat ex coniuratis, quibus hostis Cicero qui in iisdem partibus exulabat: ideoque eum verebatur Tullius.

*Cicero*



**V**Tinam illum diem videam, cum tibi agam gratias, quod me vivere coegisti. Adhuc quidem valde me poenitet: sed te oro, ut ad me \* Vibonem statim venias, quò ego multis de causis converti iter meum. Sed eò si veneris, de toto itinere, ac fuga mea consilium capere potero: si id non feceris, mirabor. Sed confido te esse omnino facturum. Vale.

VIBONEM. Oppidum Thuriorum.

*Cicero Attico S. D. A. 3. 5.*

**T**erentia tibi & sæpe, & maximas gratias agit. Id est mihi gratissimum. Ego enim vivo miserimus, & maximo dolore conficior. Ad te quid scribam nescio: Si enim es Romæ, jam me assequi non potes: sin es in via, cum eris me affecutus, coram agemus, quæ erunt agenda. Tantum te oro, ut quoniam me ipsum semper amasti, eodem amore sis. Ego enim idem sum. Inimici mea mihi, non \* me ipsum ademerunt. Cura ut valeas. 8. Id. April. Thurii.

MEIPSVM Non opes meas aut honores dilexisti; sed personam.

*Cicero Attico A. 3. 9.*

**N**ON fuerat mihi dubium, quin te Tarenti, aut Brundusii visurus essem, idque ad multa pertinuit: in eis, ut & in Epiro confisteremus, & de reliquis rebus, tuo consilio uteremur: quoniam id non contigit, erit hoc quoque in magno numero nostrorum malorum. Nobis iter est in Asiam, Cyzicum: tibi meos commendo, me vix miserèque sustento. Vale. Dat. 14. Kal. Maii. Tarenti.

*Cic. Att. 3. 25.*

**P**ost tuum à me discessum literæ mihi Roma allatæ sunt, ex quibus prospicio, nobis in hac calamitate tabescendum esse: neque enim (sed bonam in partem accipies) si ulla spes salutis nostræ subesset, tu, pro tuo amore in me, hoc tempore discessisses. Sed ne ingrati, aut ne omnia velle nobiscum unà interire videamur, hæc omitto. Illud abs te peto, des operam, id quod mihi affirmasti, ut ante Kal. Ian. ubicunque erimus, sistas. Vale.

*Cicero Attico A. 3. 16.*

**T**otum iter mihi incertum facit expectatio literarum tuarum, Kalend. Sext. datarum, nam si spes erit, Epirum, fin



LIBER SECVNDVS.

sin minus, Cyzicum, aut aliud quid sequemur. Tuæ quidem literæ, quo sæpius à me leguntur, hoc ipem mihi faciunt minorem; quod cum lectæ sunt, tum id quod attulerunt ad spem, infirmant; ut facile appareat te & consolationi servire & veritati: idque te rogo planè, ut ad me, quæscies, ut erunt, quæ putabis, ita scribas, ut putabis. Vale. Dat. 12. Kalend. Septemb.

*Cicero Att. S. A. 3. 18.*

II

**E**Xpectationem nobis non parvam attuleras, cum scripseras Varonem tibi pro amicitia confirmasse, causam nostram Pompeium certè suscepturum, & simulac à Cæsare ei literæ, quas expectaret, remissæ essent, actorem etiam datum. Utrum id nihil fuit? an adversatæ sunt Cæsaris literæ? an est aliquid in pe? etiam illud scripseras; eundem \* secundum comitia dixisse. Fac (si vides quantis in malis jaceam, & si putas esse humanitatis tuæ) me fac de tota causa nostra certiore. Nam Quintus frater homo mirus, qui me tam valde amat, omnia mittit spei plena, metuens credo defectionem animi mei. Tuæ autem literæ sunt variæ, neque enim me desperare vis, nec temere sperare. Fac, obsecro te, ut omnia, quæ à te perspicui possunt, sciamus. Vale.

SECVNDVM COMITIA. Id est, habitis comitiis de me in senatu actum iri.

*Cicero S. D. Attico. A. 3. 11.*

12

**M**E & tuæ literæ, & quidam boni nuntii, non optimis tamen auctoribus, & expectatio vestrarum literarum, & quod tibi ita placuerat, adhuc Thessalonicæ tenebant. Si accepero literas, quas expecto, si spes erit ea, quæ rumoribus afferebatur, ad te me conferam: si non erit, faciam te certiore quid egerim. Tu me, ut facis, opera, consilio, gratia juva. Consolari jam desine, objurgare verò noli: quod cum facis, ut ego tuum amorem & dolorem desidero! quem ita affectum mea ærumna esse arbitror, ut te ipsum consolari nemo possit. Quintum fratrem optimum, humanissimumque sustenta. Ad me obsecro te ut omnia certa perscribas. Vale, Datum 4. Kalend. Quint.

*Cicero*



**M**iseriæ nostræ potius velim, quam inconstantiae tribuas quod à Vibone, quo te accerlebamus, subito discessimus. Allata est enim nobis rogatio de perniciæ mea, in qua quod correctum esse audiveramus, erat huiusmodi, ut mihi ultra quingenta millia liceret esse. Illo cum pervenire non liceret, statim iter Brundisium versus contuli ante diem rogationis, ne & Sica, apud quem eram, periret: & quod Melitæ esse non licebat. Nunc tu propera, ut nos consequare, si modò recipiemur. Adhuc invitamur benignè, sed quod superest, timemus. Me, mi Pomponi, valde poenitet vivere: qua in re apud me tu plurimum valuisti. Sed hæc coram, fac modò ut venias. Vale.

*Cicero S. D. Attico. At. 1. 15.*

14

**A**Siam Quinto suavissimo fratri obtigisse audisti: non enim dubito, quin celerius tibi hoc rumor, quam ullius nostrum literæ nunciarent. Nunc, quoniam & laudis avidissimi semper fuimus, & præter ceteros Φιλαλλους Græcorum amatores & sumus & habemur; & multorum odia, atque inimicitias reipub. causa suscepimus, παντοίης ἀρετῆς μεμνησκειο omnis virtutis reminiscere, curâque effice, ut ab omnibus & laudemur, & amemur. His de rebus plura ad te in ea epistola scribam, quam ipsi Quinto dabo. Tu velim me certiolem facias, quid de meis mandatis egeris, atque etiam, quid de tuo negotio. Nam, ut Brundisio profectus es, nullæ mihi abs te sunt redditæ literæ. Valde aveo scire quid agas. Id. Mar. Vale.

*M. T. C. T. P. Attico S. D. At. 2. 10.*

15

**V**Olo ames constantiam meam. Ludos Antii spectare non placet. Est enim ἐποσολοικον subabsurdum, cum velim vitare omnium deliciarum suspicionem, repente ἀναφανισθαι apparere non solum delicatè, sed etiam ineptè peregrinantem. Quare usque ad Nonas Maias te in Formiano expectabo. Nunc fac ut sciam quo die te visuri simus. Ab Appii foro hora quarta dederam, aliam paulò ante à Tribus tabernis. Vale.

*M. T. C. T. P. Attico. At. 2. 11.*

16

**N**Arro tibi, planè relegatus mihi videor, posteaquam in Formiano sum. Dies enim nullus erat, Ant' cum essem,



## LIBER SECVNDVS.

sem, quo die non melius scirem Romæ quid ageretur, quam ii qui erant Romæ. Etenim literæ tuæ non solum quid Romæ, sed etiam quid in republica, neque solum quid fieret, verumetiam quid futurum esset, indicabant. Nunc, nisi si quid ex prætereunte viatore exceptum est, scire nihil possumus. Quare, quanquam jam te ipsum expecto, tamen isti puero, quemad me statim iussi recurrere, da ponderosam aliquam Epistolam, plenam omnium, non modò actorum, sed etiam opinionum tuarum; ac diem, quo Roma sis exiturus, cura ut sciam. Nos in Formiano esse volumus, usque ad Pridie Nonas Maias, eò si ante eum diem non veneris, Romæ te fortasse non videbo. Nam Arpinum quid ego te invitem? Hæc igitur. Cura ut valeas.

*M. T. C. T. P. Attico. A. 3. 14.*

17

**Q**UOD ad te scripseram, me in Epeiro futurum, postea. Quam extenuari spem nostram, & evanescere vidi, mutavi consilium, nec me Thessalonicâ commovi, ubi esse constitueram, quoad aliquid ad me de eo scriberes, quod proximis literis scripseras, fore, uti secundum comitia aliquid de nobis in Senatu ageretur, id tibi Pompeium dixisse. Qua de re, quoniam comitia habita sunt, tuque nil ad me scribis; perire habeo, ac scripsisses nihil esse: neque temporis non longinqui spe ductum esse, molestè feram. Quem autem motum te videre scripseras, qui nobis utilis fore videretur, cum nunciant, qui veniunt, nullum fore. In Tribunis Pleb. Dess. reliqua spes est; quam si expectâro, non erit quod putes me causæ meæ ac voluntati meorum defuisse. Quod me sæpe accusas, cur hunc meum casum tam graviter feram, debes ignoscere; cum ita me afflictum videas, ut neminem unquam nec videris nec audieris. Nam quod scribis te audire, me etiam mentis errore ex dolore affici; mihi verò mens integra est: atque utinam tam in periculo fuisset, quum ego iis, quibus salutem meam charissimam esse arbitrabar, inimicissimis crudelissimisque usus sum: qui, ut me paulum inclinare timore viderunt, sic impulerunt, ut omni suo scelere & perfidia abuterentur ad exitium meum. Nunc, quoniam jam est Cyzicum nobis



LIBER SECVNDVS.

nobis eundem, quo rariùs ad me literæ perferentur, hoc velim diligentius omnia, quæ putaris me scire opus esse, perscribas. Quintum fratrem meum fac diligas, quem ego miser si incolumem relinquo, non me totum periisſe arbitrabor. Vale. Nonis Sextil.

*Cicero S. D. Attico A. 3. 13.*

18

**E**X tuis literis plenus sum expectatione de Pompeio, quidnam de nobis velit, aut ostendat. Comitiam enim credo esse habitam: quibus absolutis, scribis illi placuisse agi de nobis. Si tibi stultus esse videor, qui sperem, facio tuo jussu: etsi scio te me iis Epistolis potius, & meas spes solitum esse remorari. Nunc velim mihi planè perscribas, quid videas. Scio nos nostris multis peccatis in hanc ærurnam incidisse: ea si qui casus aliqua ex parte correxerint, minus molestè feremus nos vixisse, & adhuc vivere. Ego propter viæ celebritatem, & quotidianam expectationem rerum novarum non commovi me adhuc Theſſalonicâ: sed iam extrudimur, non à Plancio (nam is quidem retinet) verum ab ipso loco minime appposito, ad tolerandam in tanto luctu calamitatem. In Epirum igitur, ut scripseram, non veni, quod subiti mihi adversi nuntii venerant, & literæ, quare nihil esset necesse quam proximè Italiam esse. Hinc si quid à comitiis audierimus, nos in Asiam convertemus, neque adhuc stabat, quo potissimùm: sed scies, Vale. 12. Kalend. Sext. Theſſalonicæ.

*M. T. C. T. P. Attico S. D. Ad A. 4. 14.*

19

**V**estorius noster me per literas facit certiores te Roma ad 8. Idus Maii, putare profectum esse, tardius quàm dixeras, quod minus valuisses, si iam melius vales, vehementer gaudeo. Velim domum ad tuos scribas, ut mihi tui libri pateant, non secus, ac si ipse adesses, cùm ceteri, tum Varronis. Est enim mihi utendum quibusdam rebus ex iis libris, ad eos, quos in manibus habeo: quos ut spero, tibi valde probabo. Velim si quid forte novi habes, maxime à Quinto fratre, deinde à C. Cæsare, & si quid de comitiis, de republica fortè, (soles enim tu hæc festinè odorari) conscribas ad me. Si nihil habebis, tamen scribas aliquid. Nunquam enim mihi tua Epistola aut intempestiva, aut loquax



quax visa est. Maxime autem rogo, rebus tuis, totoque itinere ex sententia confecto, nos quamprimum revisas. \* Dionysium jube salvere. Cura ut valeas.

DIONYSIVM. Dionysius Ciceronum puerorum magister fuit, qui cum pueris in provinciam proficiscebatur.

*Cicero Attico. S. A. 5. 3.*

20

**A**D 6. Idus Maias veni in Trebulanum ad Pontium: ibi mihi tuæ literæ binæ redditæ sunt tertio abs te die. Eodem autem exiens Pompeiano Philorimo dederam ad te literas: nec vero nunc erat sane quod scriberem. Qui de Republicæ rumores, scribe quæso. In oppidis enim summum video timorem. Sed multa inania. Quid de iis cogites, & quando, scire velim. Ad quas literas tibi rescribi velis nescio: nullas enim adhuc acceperam, præter quæ mihi binæ simul in Trebulano redditæ sunt: quarum alteræ edictum Publii Licinii habebant, erant autem Nonis Maiis datæ: alteræ rescriptæ ad meas Minturnenses. Quam vereor, ne quid fuerit *σπουδαίστερον* maioris ponderis in iis, quas non accepi, quibus rescribi vis. Apud Lentulum ponam te in gratiam. Dionysius nobis cordi est. Nicanor tuus operam mihi dat egregiam. Iam decet, quod scribam: & lucet. Beneventum cogitabam hodie. Nostra contentia, & diligentia faciemus satis A. Pontio. Ex Trebulano ad quintum Idus Maii.

BENEVENTVM COGITO. Sic lib. 16. Brundisium cogito.

*Cicero Attico. S. D. A. 5. 6.*

21

**T**Arentum veni ad 15. Kal. Iunii. Quod Pontinum statueram expectare, commodissimum duxi, dies eos quoad ille veniret cum Pompeio consumere: eoque magis quod ei gratum esse id videbam, qui etiam à me petierat, ut secum, & apud se essem quotidie: quod concessi libenter: multos enim ejus præclaros de republica sermones accipiam: instruar etiam consiliis idoneis ad hoc nostrum negotium. Sed ad te brevior iam in scribendo incipio fieri, dubitans Romæ ne sis, an iam profectus: quod tamen quoad ignorabo, scribam aliquid potius, quam committam, ut tibi cum possint reddi a me literæ, non reddantur. Nec tamen iam habeo, quid aut mandem tibi, aut narrem. Manda-



LIBER SECVNDVS.

vi omnia quidem: quæ tu, ut polliceis, \* exhausties: narrabo cum aliquid habebo novi. Illud tamen non desinam, dum adesse te putabo, de \* Cæsaris nomine rogare, ut confectum relin-  
quas. Avide expecto tuas literas, & maximè, ut norim tempus profectio-  
nis tuæ. Vale.

EXHAURIENS. Id est, conficies plane, ut nihil superfit,  
CAESARIS. Debebat Cæsari H. S. 120. Cicero,

*Cicero Attico. A. 7. 4.*

22

**D**ionysium flagrantem desiderio tui misi ad te, nec me hercu-  
cule æquo animo: sed fuit concedendum: Quem quidem  
cognovi cum doctum (quod mihi iam antè erat notum) tum  
sanctum, plenum officii, studiosum etiam meæ laudis, frugi  
hominem; ac, ne libertinum laudare videar, planè virum bo-  
num. Pompeium vidi 4. Idus Decemb. fuimus unà horas du-  
as fortasse. Magna lætitia mihi visus est affici meo adventu, de  
triumpho hortari, iulcipere parteis suas, monere ne ante in  
Senatum accederem, quam rem confecissem, ne dicendis sen-  
tentiis aliquem Tribunum alienarem. Quid quæris? In hoc iu-  
dicio, & officio sermonis nihil potuit esse prolixius. De Repub.  
autem ita mecum loquutus est, quasi non dubium bellum ha-  
beremus, nihil ad spem concordie. Planè Cæsa rem ab se ali-  
enatum cum ante intelligeret, tum verò proxime iudicasse.  
Venisse Hircium à Cæsare, qui esset illi familiarissimus; ad se  
non accessisse: & cum ille ad 8. Id. Decemb. vesperi venisset  
cum Balbo, de tota re constituisset ad 7. Id. ad Scipionem an-  
te lucem venisse, multa de nocte profectum esse ad Cæsarem.  
hoc illi *τελευτησιον* *σας* signum indubitatum videbatur esse alie-  
nationis. Quid multa? nihil me aliud consolatur, nisi quod il-  
lum, cui etiam inimici alterum consulatum, fortuna summam  
potentiam dederit, non arbitror fore tam amentem, ut hæc in  
discrimen adducat. Quod si ruere cœperit, nægo multa timeo  
quæ non audeo scribere: sed ut nunc est ad 3. Nonas Ianuar. ad  
uibem cogito. Vale.

*Cicero. S. D. Attico. 7. 6.*

23

**P**lanè deest quod ad te scribam, nota omnia tibi sunt: nec  
ipse habeo à te quid expectem. tantum igitur nostrum il-  
lud solenne servemus, ut ne quem istuc euntem sine literis  
di-



LIBER SECVNDVS.

dimittamus. De Repub. valde timeo, nec adhuc ferè inveni, qui non concedendum putaret Cæsari quod postularet potius quàm depugnandum. Est illa quidem impudens postulatio, opinione valentior. Cur autem nunc primum ei resistamus. *ἢ ὅτι τὸ δὲ μὲν ζῶν ἰσχυρότατον* Non enim sanè maius sequitur malum, quàm cum quinquennium prorogabamus, aut cum ut absentis ratio haberetur, ferebamus. Nisi forte hæc illi tum arma dedimus, ut nunc cum bene parato pugnaremus. Dices, quid tu igitur sensurus es? Non idem, quod dicturus. Sentiam enim omnia facienda, ne armis decertetur: Dicam idem quod Pompeius: neque id faciam humiliani. Sed rursus hoc permagnum Reipub. malum est: & quodam modo mihi præter ceteros non rectum, me in tantis rebus à Pompeio dissidere. Vale.

*Cicero Attico. A. 10.*

24

**S**UBITO consilium cepi, ut antequam luceret, exirem, ne qui conspectus fieret, aut sermo lictoribus præsertim laureatis. De reliquo, neque herculè quid agam, nec acturus quid sim, scio: ita sum perturbatus temeritate nostri amentissimi consilii. Tibi vero quid suadeam, cuius ipse consilium expecto? Cn. noster, quid consilii ceperit capiatve, nescio, adhuc in oppidis coarctatus, & stupens. Omnes, si in Italia consistat, erimus una, sin cedit, consilii res est. Adhuc certè (nisi ego infanio) stulte omnia & incautè agi iudico. Tu quæso ad me crebrò scribe, vel quod in buccam venerit. Vale.

LICTORIBVS LAUREATIS. Imperatores & in literis, & in fascibus lictorum laurea utebantur, victos hostes indicante.)

*Cicero Attico. A. 7. 19.*

25

**N**ihil habeo quod ad te scribam: quin etiam epistolam, quam eram elucubratus, ad te non dedi. Erat enim plena spei bonæ, quod & concionis voluntatem audieram, & illum conditionibus usurum putabam, præsertim suis. Ecce tibi 4. Nonas Febr. manè accepi literas tuas, Philotimi, Furnii, Curionis ad Furnium, quibus irridet L. Cæsaris legationem. Planè oppressi videmur, nec quid consilii capiam scio, nec meherculè de me laboro, de pueris quid agam non habeo. Capuam tamen proficiscebar hæc scribens, quo facilius de Pompeii rebus cognoscerem. Vale.

CIC.



**B**reviloquentem iam me tempus ipsum facit: pacem enim desperavi. Bellum nostri nullum administrant. Cave enim putes quicquam esse minoris his Coss. Quorum ego spe audiendi aliquid, & cognoscendi nostri apparatus, maximo imbri Capuam veni pridie Nonas, ut eram iussus. Illi autem nondum venerant, sed erant venturi, inanes, imparati. Cn. autem Lucerie dicebatur esse, & adire cohorteis Legionum Attianarum non firmissimarum. At illum ru re nunciant, & iam, iamque adesse, non ut manum conserat (quicum enim?) sed ut fugam intercludat. Ego autem in Italia *ἢ οὐκ ἐπὶ δαίμονι* etiam commori cupio: nec te id consulo: sin extra: quid ago? Ad manendum hyems, lictores, improvidi & negligentes duces: ad fugam hortatur amicitia Cn. causa bonorum, turpitudine coniungendi cum tyranno. Qui quidem incertum est, \* Phalarimne, an Pisistratum sit imitaturus. Hæc velim explices, & me iuves consilio. Etsi te ipsum istic iam \* calere puto: sed tamen quantum poteris. Ego si quid hic hodie novi cognôro, scies: iam enim aderunt Coss. ad suas Nonas. Tuas quotidie literas expectabo. Ad has autem, cum poteris, rescribes. Mulieres, & Cicerones in Formiano reliqui, Vale.

**PHALARIMNE.** Crudelem & tyrannum, an studiosorum & bonorum amantem. **CALERE** Dicuntur, qui molestissimis rebus intricati, exitum excogitare nequeunt. Sic Atticus cum urbem relictam a Pompeio Cæsari patere videret.

*Cicero Attico. A. 7. 21.*

**P**Edem in Italia video nullum esse, qui non in istius potestate sit. De Pompeio scio nihil, eumque, nisi in navim se contulerit, exceptum iri puto. O celeritatem incredibilem! \* Huius autem nostri. Sed non possum sine dolore accusare eum, de quo angor & crucior. Tu cædem non sine causa times, non quo minus quicquam expediat Cæsari ad diuturnitatem victoriæ, & dominationis, sed video quorum arbitrio sit acturus. Rectè sit. Censeo cedendum de oppidis iis: egeo consilii. Quod optimum factu videbitur, facies. Cum Philotimo loquere, atque adeo Terentiam habebis Idibus. Ego quid agam? Qua aut terra, aut mari persequar eum



LIBER SECVNDVS.

eum, qui ubi sit nescio? Et si terra quidem qui possum? Mari, quo? Tradam igitur isti me? Fac posse tuto, multi enim hortantur, num etiam honeste? Nullo modo. Quid? à te petam consilium, ut soleo? Explicari res non potest. Sed tamen si quid in mentem venit, velim scribas, & ipse quid sis acturus. Vale.

HVIVS NOSTRI. Sub tarditatem. Miratur & timet celeritatem Cæsaris, culpatur Pompeii ignaviā, hæret; tradatur, se Cæsari an non? *Cicer. Attico. Att. 7. 24.* 28

**C**VM dedissem ad te literas tristes, & metuo ne veras, de Lucretii ad Cassium literis Capua missis; Cephalio venit à vobis, attulit etiam à te literas hilariiores, nec tamen firmas, ut soles. Omnia facilius credere possum, quam quod scribitis, Pompeium exercitum habere. Nemo huc ica affert, omniaque quæ nolum. O rem miseram! Malas causas semper obtinuit, in optima concidit. Quid dicam? \* Nisi illud eum scisse: Neque enim erat difficile; hoc nescisse: Erat enim ars difficilis rectè Rempub. regere. Sed iam iamque omnia scimus, & scribemus ad te statim. Vale.

NISI ILLVD EVM, &c. Scivit malas causas obtinere: quod non difficile sit male agere, sed bonas causas nescivit obtinere.

*Tull. P. Attico. A. 8. 7.* 29

**V**Num etiam restat \* amico nostro ad omne dedecus, ut Domitio non subveniat. At nemo dubitat, quin subsidio venturus sit. Ego non puto. Deseret igitur talem civem? & eos quos unà scis esse? cum habeat præsertim & ipse cohortes 30. Nisi me omnia fallunt, deseret: incredibiliter pertimuit; nihil spectat, nisi fugam: cui tu (video enim quid sentias) me comitem putas debere esse. Ego vero quem fugiam, habeo; quem sequar, non habeo. Quod enim tu mecum consilium laudas, & memorandum dicis, malle quod dixerim, me cum Pompeio vinci, quam cum istis vincere: ego vero malo: sed cum illo Pompeio qui tum erat, aut qui mihi esse videbatur: cum hoc vero, qui ante fugit, quam sciat quem fugiat, aut quo, qui nostra tradidit, qui patriam reliquit, Italiam deseruit; si malui, contigit: victus sum. Quod superest, nec ista videre possum, quæ nunquam timui ne viderem, nec mehercule istum propter quem



LIBER SECVNDVS.

quem mihi non modò meis, sed memetipso carendum est. Ad Philotimum scripsi de viatico, sive à \* Moneta, non o enim solvit: sive ab \* Oppiis tuis contubernalibus. Cætera appositæ tibi mandabo. Vale.

AMICO NOSTRO. Pompeio. Victus fuit Pompeius, & Italia cecidit. Neque aspicere Cæsarem sustinebat. MONETA Templum unonis Monetæ: locus ubi moneta cudebatur, quam auri argenteive infecti permutatione habere voluit, OPPII. Fæderatores erant.

*Cn. Pomp. Proc. L. Domitio. S. A. 8. 14.*

30

**T**uas literas libenter legi, cognovi enim tuam pristinam virtutem etiam in salute communi. Coss. ad cum exercitum, quem in Apulia habui, venerunt. Magnopere te hortor pro tua singulari, perpetuoque studio in Rempub. ut te ad nos conferas, ut communi consilio Reipub. afflictæ opem atque auxilium feramus. Censeo via Appia iter facias, & celeriter Brundisium venias. Cura ut valeas.

*Cn. Pomp. Proc. L. Domitio. S. A. 8. 18.*

31

**M**iror te ad me nihil scribere, & potius ab aliis quam à te de Repub. certiores me fieri. Nos disiecta manu pares adversariis esse non possumus: contractis nostris copiis spero nos & Reipub. & saluti prodesse posse. Quamobrem cum constituisses, ut Vibullius mihi scripserat, ad Id. Febr. Corfinio proficisci cum exercitu, & ad me venire, miror quid causæ fuerit, quare consilium mutares. Nam illa causa, quam mihi Vibullius scribit, levis est, te propterea moratum esse, quod audieras Cæsarem Firmo progressum in castrum Truentinum venisse. Quanto enim magis appropinquare adversarius cœperat, eo tibi celerius agendum erat, ut te mecum jungeres, prius quam Cæsar aut tuum iter impedire, aut me abs te excludere possit. Quamobrem etiam te rogo, & hortor, id quod non destiti superioribus literis à te petere, ut primo quoque die Luceriam advenires, ante quam copię, quas instituit Cæsar contrahere, in locum unum coactæ nos à vobis distrahant. Sed si erunt, qui te impedian, ut illas suas servant, æquum est me à te impetrare, ut cohortes, quæ ex Piceno & Camerino venerunt, quæ fortunas suas reliquerunt, ad me missum facias. Vale.

*Cn. Pomp.*



**L**iteræ mihi à te redditæ sunt 14. Kal. Mart. in quibus scribis Cæsarem apud Corfinium castra posuisse. Quod putavi. & præmonui fit, ut nec in præsentia committere tecum prælium velit, & omnibus copiis conductis, te implicet, ne ad me iter expeditum tibi sit, atque istas copias coniungere optimorum civium possis cum his legionibus, de quarum voluntate dubitamus: quo magis etiam tuis literis sum commotus. Neque enim eorum militum, quos mecum habeo, voluntati satis confido, ut de omnibus fortunis Reipub. dimicem: neque etiam qui ex delectibus conscripti sunt à Coss. convenerunt. Quare da operam, si ullæ ratione etiam nunc efficere potes, ut te explices, & huc quamprimum venias, antè quàm omnes copię adversariorum conveniant. Neque enim celeriter ex delictibus huc homines convenire possunt, & si convenerint, quantum iis committendum sit, quod inter se non noti sunt, contra veteranas legiones, non te præterit. Vale.

*Cicero Attico. A. 8. 13.*

**L**ippitudinis meæ signum tibi sit librarii manus, & eadem causa brevitatis: etsi nunc quidem, quod scriberem nihil erat. Omnis expectatio nostra erat in nuntiis Brundusinis, si nactus hic esset Cn. nostrum, \* spes dubia pacis, sin ille antea transmisisset, exitiosi belli metus. Sed videsne, in quem hominem inciderit Resp? quam acutum? Quam vigilantem? Quam paratum? Si mehercule neminem occiderit, nec cuiquam quicquam ademerit, ab iis, qui eum maxime timuerant, maximè diligitur. Multum mecum municipales homines loquuntur, multum rusticani: nihil prorsus aliud curant, nisi agros nisi villulas, nisi nummulos suos. Et vide, quam conversa res est: illum, quo antea confidebant, metuunt, hunc amant quem timebant. Id quantis nostris peccatis, vitiisque evenit, non possum sine molestia cogitare. Quæ autem impendere putâram, scripseram ad te, & jam tuas literas expectabam. Vale.

**SPES DVBIA.** Quia si Cæsar assequutus erit Pompeium ante quam mare transierit, victoria penes eum videbitur.



**Q**Vum Furnium nostrum tantum vidissem, neque alloqui, neque audire meo commodo potuissem, quod properarem, atque essem in iunere, præmissis jam legionibus, præterire tamen non potui, quin & scriberem ad te, & illum mitterem, gratiasque agerem: etsi hoc officium & feci sæpe, & sæpius n. i. hi facturus videor, ita de me mereris. Imprimis à te peto, quoniam confido celeriter ad urbem venturum, ut ibi te videam, ut tuo consilio, gratia, dignitate, ope omnium rerum uti possim. Ad propositum revertar. Festinationi meæ, brevitatique literarum ignosces, reliqua ex Furnio cognosces. Vale.

*Cesar Oppio & Cornelio. S. ad Att. lib. 9. Ep. 8*

**G**Audeo meherculè vos significare literis, quàm valde probetis ea, quæ apud Corfinium sunt gesta. Consilio vestro utar libenter, & hoc libentius, quod mea sponte facere constitueram, ut quam lenissimum me præberem, & Pompeium darem operam ut reconciliarem. Tentemus hoc modo, si possumus, omnium voluntates recuperare, & diuturna victoria uti: quando reliqui crudelitate odium effugere non potuerunt, neque victoriam diutiùs tenere, præter unum L. Syllam; quem imitaturus non sum. Hæc nova sit ratio vincendi, ut misericordia, & liberalitate nos muniamus. Id enim quemadmodum fieri possit, nonnulla mihi in mentem veniunt & multa reperiri possunt. De his rebus rogo vos, ut cogitationem suscipiatis. Cn. Magium Pompeii præfectum deprehendi: sed & meo instituto usus sum, & eum statim missum feci. Iam duo præfecti fabriūm Pompeii, in meam potestatem venerunt, & à me missi sunt: si volent grati esse, debebunt Pompeium hortari, ut malit mihi esse amicus, quam iis, qui & illi & mihi semper fuerunt inimicissimi: quorum artificiiis effectum est, ut Resp. in hunc statum pervenerit, Valete.

*Cicer. Imp. S. D. Cesar. Imp. Att. 9. ex epist. 11.*

**V**T legi tuas literas, quas ab Furnio nostro acceperam, quibus mecum agebas, ut ad urbem essem: te velle uti consilio, & dignitate mea; minus lum admiratus. De gratia, & de ope quid significares, mecum ipse quærebam, spe.



LIBER SECVNDVS.

spe tamen deducebar ad eam cogitationem, ut te, pro tua admirabili ac singulari sapientia, de otio, de pace, de concordia civium agi velle, arbitrarer: & ad eam rationem existimabam satis aptam esse naturam & personam meam. Quod si ita est, & si qua de Pompeio nostro tuendo, & tibi, ac Reip. reconciliando, cura te attingit, magis idoneum, quam ego sum, ad eam causam profecto reperies neminem, qui & illi semper & senatui, cum primum potui, pacis author fui. Nec sumptis armis belli ullam partem attigi, iudicavique te eo bello violari, contra cuius honorem populi Romani beneficio concessum, inimici, atque invidi niterentur. Sed ut eo tempore non modo ipse author dignitatis tuæ fui, verumetiam cæteris author ad te adiuvandum, sic me nunc Pompeii dignitas vehementer movet. Aliquot enim sunt anni, cum vos duos delegi, quos præcipuè colerem, & quibus essem, sicut sum, amicissimus. Quamobrem à te peto, vel potius precibus omnibus oro, & obtestor, ut in tuis maximis curis aliquid impertias temporis huic quoque cogitationi, ut tuo beneficio bonus vir, gratus, pius denique esse in maximi beneficii memoria possim. Quæ si tantum ad me ipsum pertinerent, sperarem me à te tamen impetraturum: sed ut arbitror, & ad tuam fidem, & ad Rempub. pertinet, me & ad pacem utriusque vestrum, & ad civium concordiam, per te quam accommodatissimum conservari. Ego cum antea tibi de Lentulo gratias egissem, cum ei saluti, qui mihi fuerat, fuisses, tamen eius literis lectis, quas ad me gratissimo animo de tua liberalitate beneficioq; misit, eandem me salutem a te accepisse putavi, quam ille: in quem si me intelligis esse gratum, cura obsecro, ut etiam in Pompeium esse possim. Vale.

*Balbus Cicer. Imp. S. D. ad Att. 9. 16.*

37

**C**Æsar nobis literas perbreves misit, quarum exemplum subscripsi. Brevitate epistolæ scire poteris eum valde esse distentum, qui tanta de re tam breviter scripserit. Si quid præterea novi fuerit, statim tibi scribam.

*Cæsar Oppio, Cornelioque. S.*

38

**A**D 8. Kal. Mart. Brundisium veni, ad murum castra posui, Pompeius est Brundisii, misit ad me Cn. Magium de pace



pace: quæ visa sunt respondi, Hoc vos statim scire volui, cum in spem venero de compositione aliquid me conficere, statim vos certiores faciam. Valete. Quomodo me nunc putas, mi Cicero, torqueri postquam rursus in spem pacis veni, nequa res compositionem eorum impediat? Namque quod absens facere non possum, opto: quod si unà essem, aliquid fortasse proficere possem. Nunc expectatione crucior. Vale.

*Cic. Attico S. D. Att. 10. 2.*

39

**E**CUM accepissem tuas literas Nonis April. quas Cephalio attulerat, essemque Minturnis postridiè mansurus, protinus sustinui me in Arcano fratris, ut dum aliquid certius afferretur, occultiore in loco essemus, agerenturq; nihilominus quæ sine nobis agi non possunt. \* *Λαλαγευσα* Hirundo jam adest, & animus ardet, nec est quicquam \* quo & qua: sed hæc nostra erit cura, & peritorum. Tu tamen quoad poteris, ut adhuc fecisti, nos consiliis juvabis. Res sunt inexplicabiles. Fortunæ sunt committenda omnia: sine spe conamur ulla. Melius si quid acciderit, mirabimur. Dionysium noli ad me profectum, de quo ad me Tullia mea scripsit: sed & tempus alienum est, & homini non amico nostra incommoda, tanta præsertim, spectaculo esse nollem: cui te meo nomine inimicum esse nolo. Vale.

† Hirundo. Locus præter omnes depravatus in Græca voce *Λαλαγευσα* garrula, cujus adventus ver declarat: sed Cic. intelligi volebat vulgo: sic epist. 10. lib. ad Att. Ne interciperetur ab hostibus inter navigandum. QVO & QVA. Quâ utar viâ, quo iter tenendum.

*Cæsar Imp. M. C. Imp. S. Att. 10. 9.*

40

**E**TSI te nihil temerè, nihil imprudenter facturum judicâram, tamen permotus hominum fama, scribendum ad te existimavi, & pro nostra benevolentia petendum, ne quo progredieris proclinata jam re, quo integra etiam progrediendum tibi non existimasses. Namque & amicitia graviolem injuriam feceris, & tibi minus commodè consulueris, si non fortunæ obsecutus videbere (omnia enim secundissima nobis, adversissima illis accidisse videntur) nec causam secutus, ut deberes (eadem enim tum fuit, cum ab eorum consiliis abesse judicasti) sed meum aliquod factum condem-

nasse,



nasse, quo mihi gravius abs te nihil accidere potest: quod ne facias pro jure nostræ amicitiae à te peto. Postremo, quid viro bono & quieto, & bono civi magis convenit, quam abesse à civilibus controversiis? Quod nonnulli cum probarent, periculi causa equi non potuerunt: tu explorato, & vitæ meæ testimonio, & amicitiae iudicio, neque tutius, neque honestius reperies quicquam, quam ab omni contentione abesse. Vale.

*Cicero Attico. Att. II. Epist. 18.*

41

**D**E illius ab Alexandria discessu, nihil adhuc rumoris, contraque opinio, valde esse impeditum. Itaque nec mitto (ut constitueram) Ciceronem: & te rogo, ut me \* hinc expedias. Quodvis enim supplicium levius est hac mansione. Hac de re & ad Antonium scripsi, & ad Balbum, & ad Oppium. Sive enim bellum in Italia futurum est, sive claudibus utetur, hic me esse minime convenit; quorum fortasse utrumque erit: alterum certè. Intellexi omnino ex Oppii sermone, quem tu mihi scripsisti, quæ istorum via esset: sed ut eum flectas, te rogo. Nihil omnino iam expecto nisi miserum. Sed hoc perditius in quo nunc sum, fieri nihil potest. Quare cum Antonio loquere velim, & cum istis, & rem ut poteris, expedias, & mihi quamprimum de omnibus rebus rescribas. Vale. 12. Kal. Quint.

HINC. Brundisio discedere cupit, propter bellum à Pompejanis Cæsari concitarum.

*Cicero Attico. Att. II. 19.*

42

**Q**Uum tuis dare possem literas, non prætermisi, etsi quid scriberem non habebam. Tu ad nos & rarius scribis quam solebas, & brevius: credo quia nihil habes, quod me putes libenter legere aut audire posse. Verumtamen velim si quid erit, qualecunque erit, scribas. Est autem unum, quod mihi sit optandum, quid agi de pace possit; quod nulla equidem habeo in spe. Sed quia tu leviter interdum significas, cogis me sperare quod optandum vix est. Philotimus dicitur secedere Id. Sextil. nihil habeo de eo amplius. Tu velim ea mihi rescribas, quæ ad te antea scripsi. Mihi tantum temporis satis est, dum in pessimis rebus aliquid caveam, qui nihil unquam cavi. Vale. 11. Kal. Sext.

*Cic.*



**O**ccupationibus est factum meis, & subita tua profectio, ne tecum coram de hac re agerem: quam ob causam vereor, ne absentia mea levior sit apud te. Quod si bonitas tua responderit iudicio meo, quod semper habui de te, gaudebo. A Cæsare petii ut Sextum Clodium restitueret, impetravi. Erat mihi in animo etiam tum sic uti beneficio ejus, si tu concessisses; quo magis laboro, ut & tua voluntate id per me facere liceat. Quod si duriores te ejus miseræ & afflictæ fortunæ præbes, non contendam ego adversus te, quanquam videor debere tueri \* commentarium Cæsaris. Sed mehercule si humaniter, & sapienter, & amabiliter in me cogitare vis, facilem te profecto præbebis: & voles P. Clodium in optima spe puerum repositum existimare, non te infectatum esse, cum poteris amicos paternos. Patere, obsecro te, pro republica videri gessisse simultatem cum patre ejus. Non contempseris hanc familiam. Honestius enim, & libentius deponimus inimicitias, reipublicæ nomine susceptas, quam contumaciæ. Me deinde sine ad hanc opinionem jam nunc dirigere puerum, & tenero animo ejus persuadere, non esse tradendas posteris inimicitias. Quanquam tuam fortunam, Cicero, ab omni periculo abesse certum habeo, tamen arbitror malle te quietam senectutem, & honorificam potius agere, quam sollicitam. Postremo, meo jure te hoc beneficium rogo: nihil enim non tua causa feci. Quod si non impetro, per me Clodio daturus non sum: ut intelligas quanti apud me authoritas tua sit, atque eo te placabiliorem præbeas. Vale.

COMMENTARIUM CAESARIS. senatus decrevit ut quæ Cæsar egisset, rata manerent.

*Cic. Planc. PR. Desi. S. ad Att. 16. 20.*

44

**I**gnosce mihi quod cum antea accuratissimè de Buthrotiis ad te scripseram, eâdem de re sæpius scribam. Non mehercule, mi Plance, facio, quod parùm confidam aut liberalitati tuæ aut nostræ amicitiae: sed cum tanta res agatur Attici nostri, nunc verò etiam existimatio, ut id quod probavit Cæsar nobis testibus, & obsignatoribus, qui & decretis & responsis Cæsaris interfueramus, videatur obtinere potuisse, præsertim cum



LIBER SECVN DVS.

cùm tota potestas ejus rei tuasit, ut ea quæ Coss. decreverant secundùm Cæsaris decreta, & responsa, non dicam comprobes, sed studiosè, libenterque comprobes. Id mihi sic erit gratum, ut nulla res gratior esse possit. Etsi jam sperabam, cum has literas accepisses, fore, ut ea, quæ superioribus literis à te petiissemus, impetrata essent, tamen non taciàm finem rogandi, quoad nobis nunciatum erit, te id fecisse, quod cum magna spe expectamus. Deinde enim confido fore, ut alio genere literarum utamur, tibi que pro summo beneficio gratias agamus: quod si acciderit, velim sic existimes, non tibi tam Atticum, cuius permagna res agitur, quam me, qui non minus laudoro quam ille, obligatum fore. Vale.

*C. Cero Capitoni S. ad Attic. 16. 15.*

45

**N**ON dubito, quin mirere, atque etiam stomachere, quod tecum de eadem re agam sæpius. Hominis familiarissimi, mihi omnibus rebus conjunctissimi, permagna res agitur, Attici. Cognovi ego tua studia in amicos, etiam in te amicorum. Multum potes nos apud Plancum juvare. Novi humanitatem tuam. Scio quam sis amicis jucundus. Nemo nos in hac causa plus iuvare potest quam tu; & res est ita firma, ut debet esse, quam Coss. de concilii sententia decreverunt, cum & lege & S. C. cognoscerent. Tamen omnia posita putamus in Planci tui liberalitate, quem quidem arbitramur cùm officii tui, & reipublicæ causa decretum Coss. comprobaturum, tum libenter nostra causa esse facturum. Adjuvabis igitur, mi Capito, quod ut facias vehementer etiam atque etiam rogo. Vale.

*FINIS LIBRI SECVNDI.*







# LIBER TERTIVS

*Servius Sulpitius M. T. C. S. Fam. lib. 4. Epist. 5*

1

**P**osteaquam mihi renunciatum est de obitu Tulliae filiae tuae, sanè quàm, pro eo ac debui, graviter molestèq; tui, communemq; eam calamitatem existimavi: qui si istic fuisset, neque tibi defuissem, coramque tibi meum dolorem declarassem. Et si genus hoc consolationis miserum atque acerbum est, propterea quia per quos ea fieri debet propinquos ac familiares, ipsi pari molestia afficiuntur, neque sine lachrymis multis id conari queunt: ut magis ipsi videantur aliorum consolatione indigere, quam aliis posse suum officium præstare: tamen quæ in præsentia mihi in mentem venerunt, decrevi brevi ad te pericribere: non quod ea te fugere existimem, sed quod forsitan dolore impeditus, minus ea perspicias. Quid est, quod te tantopere commoveat tuus dolor intestinus? Cogita, quemadmodum adhuc fortuna nobiscum egerit; ea nobis erepta esse, quæ hominibus non minus quam liberi chara esse debent, patriam, honestatem, dignitatem, honores omnes. Hoc uno incommodo addito, quid ad dolorem adjungi potuit? Aut qui non in illis rebus exercitatus animus callere iam debet, atque omnia minoris aestimare? An illius vicem, credo, doles? Quoties in eam cogitationem necesse est, & tu veneris, & nos sæpe incidamus, hi ceteris temporibus non pessimè cum iis esse actum, quibus sine dolore licitum est mortem cum vita commutare. Quid autem fuit, quod illam hoc tempore ad vivendum magnopere invitare posset? Quæ res? Quæ spes? Quod animi solatium? ut cum aliquo adolescente primario coniuncta, ætatem ageret? Licitum est tibi (credo) pro tua dignitate, ex hac iuventute generum deligere, cuius fidei liberos tuos, te tutò committere,



## LIBER TERTIVS

committere putares? An ut ea liberos ex sese pareret, quos  
 cum florenteis videret, lætaretur? Qui rem à parente tra-  
 ditam per se tenere possent? Honores ordinatim in republica  
 petituri essent? In amicorum negotiis liberalitate sua uteren-  
 tur? Quid horum fuit, quod non prius, quam datum est, a-  
 demptum sit? At verò malum est liberos amittere. Malum,  
 nisi hoc peius sit hæc sufferre & perpeti. Quæ res mihi non  
 mediocrem consolationem attulit, volo tibi commemorare, si  
 fortè eadem res tibi minuire dolorem posset. Ex Asia redi-  
 ens, cum ab Ægina Megaram versus navigarem, cœpi regio-  
 nes circumcirca prospicere: post me erat Ægina, ante Me-  
 gara, dextra Piræus, sinistra Corinthus: quæ oppida quodam  
 tempore florentissima fuerunt; nunc prostrata & diruta ante  
 oculos iacent. Cœpi egomet mecum sic cogitare: hem nos  
 homunculi indignamur, si quis nostrum interiit, aut occisus  
 est, quorum vita brevior esse debet, cum uno loco tot oppi-  
 dorum cadavera proiecta iaceant. Vis tu te Servi cohibere,  
 & meminisse hominem te esse natum? Crede mihi, cogita-  
 tione ea non mediocriter sum confirmatus. Hoc idem si tibi  
 videtur, fac ante oculos tibi proponas, modò uno tempore  
 tot viri clarissimi interierunt: de imperio præterea tanta di-  
 minutio facta est, omnes provinciæ conquassatæ sunt: in uni-  
 us mulierculæ animula si iactura facta sit, tantopere com-  
 movêris? Quæ si hoc tempore non suum diem obiisset, pau-  
 cis post annis tamen ei moriendum fuit, quoniam homo nata  
 fuerat. Etiam tu ab hisce rebus animum ac cogitationem tu-  
 am avoca, atque ea potius reminiscere, quæ digna tua per-  
 sona sunt: illam quamdiu ei opus fuerat, vixisse, unâ cum  
 republica fuisse, te patrem suum Prætorem, Consulem,  
 Augurem vidisse, \* adolescentibus primariis nuptam fuisse,  
 omnibus bonis prope perfunctam esse, cum respublica occi-  
 deret vita excessisse. Quid est quod tu, aut illa cum fortu-  
 nâ, hoc nomine queri possitis? Denique, nolite oblivisci  
 Ciceronem esse, & eum qui aliis conlueveris præcipere,  
 & dare consilium: nec imitari malos medicos, qui in alie-  
 nis morbis profitentur se tenere medicinæ scientiam,  
 ipsi se curare non possunt: sed potius quæ aliis tute  
 præ-



# LIBER TERTIVS.

tute præcipere soles, ea tute tibi subiice, atque apud animum tibi propone: Nullus dolor est, quem non longinquitas temporis minuatur atque molliat. Hoc te expectare tempus, tibi turpe est, ac non ei rei sapientiâ tuâ te occurrere. Quod si quis etiam inferis sensus est, qui illius amor in te fuit; pietasque in omnes suos, hoc certe illa te facere non vult. Da hoc illi mortuæ; da cæteris amicis ac familiaribus, qui tuo dolore mœrent: da patriæ, ut, si qua in re opus sit opera & consilio tuo, uti possit. Denique, quoniam in eam fortunam devenimus, ut etiam huic rei nobis serviendum sit, noli committere, ut quisquam te putet non tam filiam, quam Reipub. tempora, & aliorum victoriam lugere. Plura me ad te de hac re scribere pudet, ne videar prudentiæ tuæ diffidere. Quare si hoc unum proposuero, finem faciam scribendi. Vidimus aliquoties secundam pulcherrimè te ferre fortunam, magnamque ex ea re te laudem adipisci, fac aliquando intelligamus, adversam quoque te æque ferre posse, neque id maius quam debeat tibi onus videri: ne ex omnibus virtutibus, hæc una tibi videatur deesse. Quod ad me attinet, cum te tranquilliori animo esse cognovero, de iis rebus, quæ hic geruntur, quemadmodum se provincia habeat, certiorcm faciam.

ADOLESCENTIBVS PRIMARIIS. Ter Tullia nupsit: primum C. Calpurnio Pisoni Frugi. Epist. 2. Lib. 1. Attic. Secundo Furio Crassipedi. Epist. 4. Lib. 2. ad fratrem. (De cuius neque obitu, neque divortio constat) Postremo, P. Cornelio Dolabellæ collocata, & ab eo repudiata periit ex partu.

*Cic. Servio Sulp. Famil. lib. 4. Epist. 6.*

**E**GO verò (Servi) velim, ut scribis, in meo gravissimo casu adfuisses. Quantum enim præsens me adiuvere potueris, & consolando, & prope equè dolendo, facile ex eo intelligo, quod literis tuis lectis aliquantum acquievi. Nam & ea scripsisti, quæ levare luctum possent; & in me consolando, non mediocrem ipse animi dolorem adhibuisti. Servius autem tuus omnibus officiis, quæ illi tempori tribui potuerunt, declaravit, & quanti ipse me faceret, & quam suum idem erga me animum tibi gratum putaret fore, cuius officia iucundiora scilicet sæpe mihi fuerunt: nunquam tamen gratiora.



## LIBER TERTIVS.

tiora. Me autem non oratio tua solum, & societas pœnæ ægritudinis, sed etiam authoritas consolatur. Turpè enim esse existimo, me non ita ferre casum meum, ut tu tali sapientia præditus, ferendum putas. Sed opprimor interdum; & vix resisto dolori, quod ea me solatia deficiunt. quæ cæteris, quorum mihi exempla propono, simili in fortuna non defuerunt. Nam & Quintus Maximus, qui filium consularem clarum virum, & magnis rebus gestis amisit, & L. Paulus, qui duos septem diebus, & noster Gallus, & M. Cato, qui summo ingenio, summa virtute filium perdidit, iis temporibus fuerunt ut eos ipsorum dignitas consolaretur ea quam ex Repub. consequebantur: mihi autem, amissis ornamentis iis, quæ ipse commemoras, quæque eram maximis laboribus adeptus, unum manebat illud solatium, quod ereptum est. Non amicorum negotiis, non Reipub. procuratione impediabantur cogitationes meæ, nihil in foro agere libebat, aspicere curiam non poteram: existimabam id quod erat, omnes me & industriæ meæ fructus & fortunæ perdidisse. Sed cum cogitarem hæc mihi tecum & cum quibusdam esse communia, & cum frangerem jam ipse me, cogeremque illa ferre toleranter, habebam quo confugerem, ubi conquiescerem, cuius in sermone, & suavitate, omnes curas, doloresque deponerem. Nunc autem hoc tam gravi vulnere, etiam illa quæ consenuisse videbantur, recrudescent. Non enim ut tum me à Repub. mœstum domus excipiebat, quæ levaret, sic nunc domo mœrens ad Rempub. confugere possum, ut in ejus bonis acquiescam. Itaque & domo absum, & foro, quod nec eum dolorem, quem è Repub. capio, domus iam consolari potest, nec domesticum Respub. Quo magis te expecto. teque videre quamprimum cupio. Maior mihi ratio afferri nulla potest, quam coniunctio consuetudinis, sermonumque nostrorum. Quamquam sperabam tuum adventum (sic enim audiebam) appropinquare. Ego autem cum multis de causis te exopto quamprimum videre,

tum



## LIBER TERTIVS.

tum etiam ut ante commentemur inter nos, qua ratione nobis traducendum sit hoc tempus, quod est totum ad unius voluntatem accommodandum, & prudentis, & liberalis, & (ut perspexisse videor) nec a me alieni, & tibi amicissimi. Quod cum ita sit, magnæ tamen est deliberationis, quæ ratio sit ineunda nobis non agendi aliquid, sed illius concessu & beneficio quæscendi. Vale.

QVINT. FAB. MAXIM. Cuius filius Consularis, Hannibalem exultantem iuveniliter patientia molivit, Arpes opidum ab Hannibale munitum cepit. L. PAVLVS. Liu. 45. Velleius, lib. 1. Paulus fuit AEmilius, qui victo Persa Rege; Macedoniam imperio adiunxit & in ærarium intulit ex præda bis milles centies H. S. SVLPITIVS GALLVS. Consul Ligures devicit. Cato Censorius.

*M. C. S. D. Luceio. 2. filio Fam. Lib. 5. Ep. 12.*

**C**Oram me tecum eadem hæc agere sæpe conantem, deterruit pudor quidam pene subrusticus: quæ nunc exponam absens audacius: Epistola enim non erubescit. Ardeo cupiditate incredibili, neque (ut ego arbitror) reprehendenda, nomen ut nostrum scriptis illustretur & celebretur tuis quod etsi mihi sæpe ostendis te esse facturum, tamen ignoscas velim huic festinationi meæ. Genus enim scriptorum tuorum, etsi erat semper à me vehementer expectatum, tamen vicit opinionem meam, meque ita vel cepit, vel incendit, ut cupe-rem quam celerimè res nostras monumentis commendari tuis. Non enim me solum commemoratio posteritatis ad spem quandam immortalitatis rapit, sed etiam illa cupiditas, ut vel autoritate testimonii tui, vel iudicio benevolentie, vel suavitate ingenii vivi perfruamur. Neque tamen, hæc cum scribebam, eram nescius quantis oneribus premere susceptarum rerum, & iam institutarum: sed quia videbam Italici belli, & civilis historiam, iam penè à te esse peractam: dixeras autem mihi, te reliquas res ordiri, deesse mihi nolui quin te admonerem, ut cogitares, coniunctè nemalles cum ceteris rebus nostra contexere, an ut multi Græci fecerunt, Callisthenes Troicum bellum, Timæus Pyrrhi, Polybius Numantinum, qui omnes à perpetuis suis historiis ea quæ dixi bella separaverunt: tu quo-



## LIBER TERTIVS.

quoque ita civilem conjurationem ab hostibus externisque bellis sejungeres. Equidem ad nostram laudem non multum video interesse, sed ad properationem meam quiddam interest, non te expectare, donec ad locum venias, ac statim causam illam totam & tempus arripere. Et simul si uno in argumento, unaque in persona, mens tua tota versabitur, cerno iam animo, quanto omnia uberiora, atque ornatiora futura sint. Neque tamen ignoro, quam imprudenter faciam, qui primum tibi tantum oneris imponam (potest enim mihi denegare occupatio tua) deinde etiam, ut ornes me postulem. Quid si illa tibi non tantopere videntur ornanda: Sed tamen qui semel verecundiæ fines transierit, eum bene, & gnavius oportet esse impudentem. Itaque te plane etiam atque etiam rogo, ut ornes ea vehementius, quam fortasse sentis, & in eo \* leges historiæ negligas, gratiamque illam, de qua suavissimè quodam in proœmio scripsisti, à qua te affici non magis potuisse demonstras, quam Herculem Xenophontium illum à voluptate, ea si me tibi vehementius commendabit, ne aspernere, amorique nostro plulculum etiam, quam concedit veritas, largiari. Quod si te adducemus, ut hoc suscipias, erit (ut mihi persuadeo) materies digna facultate, & copia tua. A principio enim coniurationis, usque ad reditum nostrum videtur mihi modicum quodam corpus confici posse: in quo & illa poteris uti civilium commutationum scientia, vel in explicandis causis rerum nostrarum, vel remediis incommodorum, cum & reprehendes ea quæ vituperanda duces, & quæ placebunt, exponendi rationibus comprobabis, & si liberius, ut consuevisti, agendum putabis, multorum in nos perfidiam, insidias, prodicionem notabis. Multam etiam casus nostri tibi varietatem in scribendo suppeditabunt, plenam cuiusdam voluptatis, quæ vehementer animos hominum in legendo scripto retinere possit. Nihil est enim aptius ad delectationem lectoris, quam temporum varietates, fortunæque vicissitudines: quæ etsi nobis optabiles in experiendo non fuerunt, in legendo tamen erunt jucundæ. \* Habet enim præteriti doloris secura recordatio delectationem: cæteris vero, nulla perfunctis propria.



### LIBER TERTIVS.

propria molestia, casus alienos sine ullo dolore intuentibus, etiam ipsa misericordia est iucunda. Quem enim nostrum ille moriens apud \* Mantineam Epaminondas non cum quadam miseratione delectat? Qui tum denique sibi avelli iubet spiculum, posteaquam ei percontanti dictum est, clypeum esse saluum, ut etiam in vulneris dolore, æquo animo cum laude moreretur. Cuius studium in legendo non erectum Themistoclis fugâ redituque retinetur? Etenim ordo ipse annalium mediocriter nos retinet quasi enumeratione fastorum. At viri sepe excellentis anticipites varique casus habent admirationem, expectationem, lætitiā, molestiam, spem, timorem, si vero exitu notabili concluduntur, expletur animus iucundissima lætitionis voluptate. Quod mihi acciderit optatius, si in hac sententia fueris, ut à continentibus tuis scriptis, in quibus perpetuam rerum gestarum historiam complecteris, secernes hanc quasi fabulam rerum eventorumque nostrorum. habet enim varios actus, multasque actiones & consiliorum, & temporum. Ac non vereor ne assentatiuncula quadam aucupari tuam gratiam videar, cum hoc demonstrem, me à te potissimum ornari, celebrarique velle. Neque enim tu is es, qui quis sis nescias, & qui non eos magis, qui te non admirentur, invidos, quam eos qui laudent, assentatores arbitrere. Neque autem ego sim ita demens ut me sempiternæ gloriæ per eum commendari velim qui non ipse quoque in me commendando propriam ingenii gloriā consequatur. Neque enim Alexander ille gratiæ cauta, ab Apelle potissimum pingi, & à Lysippo fingi volebat; sed quod illorum artem, cum ipsis, tum etiam sibi, gloriæ fore putabat. Atqui illi artifices, corporis simulacra ignotis nota faciebant, quæ vel si nulla sint, nihilo sunt tamen obscuriores clari viri. Nec minus enim est Spartiatus ille Agesilaus perhibendus, qui neque pictam neque fictam imaginem suam passus est esse, quam qui in eo genere laborarunt: unus enim Xenophontis libellus in eo Rege laudando, facile omnes imagines hominum



## LIBER TERTIVS.

num, statuasque superavit, atque hoc præstantius mihi fuerit, & ad lætitiā animi, & ad memorię dignitatem, si in tua scripta pervenero, quā si in ceterorum; quod non ingenium mihi solum suppeditatum fuerit tuum, sicut Timoleonti à Timæo, aut ab Herodoto \* Themistocli: sed etiam auctoritas clarissimi & spectatissimi viri, & in Reipub. maximis gravissimisque causis cogniti, atque in primis probati viri: ut mihi non solum præconium, quod cum in Sigæum venisset Alexander, ab Homero Achilli tributum esse dixit, sed etiam grave testimonium impertitum clari hominis magnique videatur. Placet enim Hector ille mihi Nævianus: qui non tantum laudari se letatur, sed addit etiam à laudato viro. Quod si à te non impetro, hoc est; si qua res te impedierit (neque enim fas esse arbitror quicquam me rogantem abs te non impetrare) cogar fortasse facere quod non nulli sæpe repræhendunt; scribam ipse de me: multorum tamen exemplo, & clarorum virorum. Sed, quod te non fugit, hæc sunt in hoc genere vitia, & ut verecundiùs ipsi de se scribant, necesse est, si quid est laudandum, & prætereant si quid reprehendendum est. Accedit etiam ut minor sit fides, minor auctoritas, multi denique reprehendant & dicant, verecundiores esse præcones ludorum gymnycorum, qui cum cæteris coronas impo- fuerint victoribus, eorumque nomina magna voce pronunciant, cum ipsi ante ludorum missionem coronâ donentur, alium præconem adhibeant, ne sua voce ipsi se victores esse prædicent. Hæc nos vitare cupimus, & si recipis causam nostram, vitabimus. Idque ut facias rogamus. Ac ne fortè mirere, cur, cum mihi sæpe ostenderis te accuratissimè nostrorum temporum consilia atque eventus literis mandaturum; à te nunc id tantopere, & tam multis verbis petamus; illa nos cupiditas incendit, de qua initio scripsi, festinationis, quod alacres animo sumus, ut & cæteri viventibus nobis ex libris tuis nos cognoscant, & nosmet ipsi vivi gloria nostra perfruamur. His de rebus quid acturus sis, si tibi non est molestum, rescribas mihi velim. Si enim suscipis causam, conficiam commentarios rerum omnium. Sin autem differs me in tempus aliud, coram tecum loquar. Tu interea non cessabis



LIBER TERTIVS.

sabis, & ea quæ habes instituta, perpolies: nosque diliges, Vale.

Tres HISTORIAE LEGES. Cicero 2. de Oratore narrat. 1. Ne quid falsi dicere audeamus. 2. Ne quid veri non audeamus. 3. Ne qua gratiæ aut similitudinis sit suspicio.

HABET ENIM PRAETERITI.

Virgil.

*Forsan & hæc olim meminisse iuvabit.*

Cic. 2. de Finib. Incunda est præteritorum malorum memoria.

MANTINEAM. Urbem Arcadiæ nobilitatam clade Lacedæmoniorum & victoria Epaminondæ Thebanorum Ducis. Iust. libr. 6. Strab. lib. 8. Læta vulnere perfossus quæsit an victi hostes an salvus clypeus, tum hastile eripi iussit, ut lætus expiraret.

THEMISTOCLES. Venerat in suspensionem pacti fœderis cum Persarum Rege Artaxerxe, idcirco timens Athenienses, & eorum fugiens iram ad illum se contulit.

Cicero Attico. Att. 8. 3.

4

**M**aximis & miserrimis rebus perturbatus sum, cum coram tecum mihi potestas deliberandi non esset, sed uti tamen consilio volui. Deliberatio autem omnis hæc est; si Pompeius Italia excedat (quod cum facturum esse suspicor) quid mihi agendum putes. Et quo facilius consilium dare possis, quid in utramque partem mihi in mentem veniat, explicabo brevi. Cum merita Pompeii summa erga salutem meam, familiaritasque quæ mihi cum eo est, tum ipsa reipublicæ causa me adducit, ut mihi vel consilium meum cum illius consilio; vel fortuna cum fortunâ conjungenda esse videatur. Accedit illud: si maneo, & illum comitatum optimorum, & clarissimorum civium deserero, cadendum est in unius potestatem: qui, etsi multis rebus significat se nobis esse amicum, & ut esset, à me est (tute scis) propter suspensionem hujus impendentis tempestatis multo ante provisum: tamen utrumque considerandum est, & quanta ei fides sit habenda: & si maxime exploratum sit, cum nobis amicum fore, sitne viri fortis, & boni civis, esse in ea urbe, in qua, cum summis honoribus imperiisque usus sit, res maximas gesserit, sacerdotio sit amplissimo præditus, non futurus sit sui juris, subeundumque periculum sit, cum aliquo forte dedecore, si quando Pompeius rempublicam recuperaverit, \* In hac parte hæc sunt. Vide nunc, quæ sunt in altera. Nihil est actum à Pompeio nostro sapienter.



## LIBER TERTIVS.

sapienter, nihil fortiter : adde etiam , nihil nisi contra consilium , auctoritatemque meam. Omitto illa vetera, quae istum in rempublicam ille aluit, auxit, armavit : ille legibus per vim, & contra auspicia ferendis author : ille Galliae ultioris adjunctor : ille gener : ille in adoptando P. Clodiae augur : ille restituendi mci, quam retinendi studiosior ille provinciae propagator; ille absentis in omnibus adjutor. Idem etiam tertio consulatu, postquam esse defensor reipublicae coepit, contendit, ut decem Tribuni plebis ferrent, ut absentis ratio haberetur : quod idem ipse sanxit lege quadam sua, Marcoque Marcello Cos. finienti provincias Kalend. Martii restitit. Sed, ut haec omittam, Quid foedius? Quid perturbatius hoc ab urbe discessu, sive potius turpissima fuga? Quae conditio non accipienda fuit potius, quam relinquenda patria. Malae conditiones erant, fateor : sed numquid hoc pejus? At recuperabit rempublicam. Quando? Aut quid ad eam spem est parati? Non ager Picenus amissus? Non patefactum iter ad urbem? Non pecunia omnis & publica, & privata adversario tradita? Denique nulla causa, nulla vires, nulla sedes, quo concurrant, qui rempublicam defensam velint. Apulia delecta est inanissima pars Italiae, & ab impetu huius belli remotissima : fuga & maritima opportunitas visa quaeri desperatione. Invitè cepi Capuam, non quò munus illud defugerem, sed sic in ea causa, in qua nullus esset ordinum, nullus apertus privatorum dolor, bonorum autem erat aliquis, sed hebes, ut solet, &, ut ipse sensissem, multitudo, & infimus quisque propensus in alteram partem, multi mutationis rerum cupidi, dixi ipsi, me nihil suscepturum sine praesidio & sine pecunia. Itaque habui nihil omnino negotii, quod ab initio vidi, nihil quaeri praeter fugam. Eum si nunc sequor, quonam? Cum illo non : ~~ad quem~~ cum essem profectus, cognovi in iis locis esse Caesarem, ut tutò Luceriam venire non possem. \* Infero mari nobis incerto cursu hyeme maxima navigandum est. Age iam cum fratre, an sine? Cum filio? Aut quomodo? In utraque enim re summa difficultas erit, summus animi dolor. Qui autem impetus illius erit in nos absenteis fortunasque nostras? Acrior, quàm



## LIBER TERTIVS.

in ceterorum: quod putabit fortasse in nobis violandis aliquid se habere popolare. Age jam has compedes, fasces inquam hos laureatos, efferre ex Italia quam molestum est? Qui autem locus erit nobis tutus, ut jam placatis utamur, fluctibus antequam ad illum venerimus? Qua autem, aut quod nihil scimus. At si restitero, & fuerit nobis in hac parte locus, idem fecero, quod in Cinnae dominatione, & Marii tyrannide, Philippus; quod L. Flaccus; quod Quintus Mutius, quoquomodo ea res huic quidem cecidit: qui tamen ita dicere solebat, se id fore videre quod factum est, sed hoc malle, quam armatum ad patriae moenia accedere. Aliter \* Thrasylbus, & fortasse melius; sed est certa quaedam illa Mutii ratio, atque sententia: est aliqua etiam Thrasyluli: & cum sit necesse servire temporibus, & non amittere tempus cum sit datum, sed in hoc ipso tamen habent & iidem falces molestiam. Sit enim nobis amicus, quod incertum est; sed sit: deferet triumphum? non accipere ne periculosum sit: accipere invidiosum ad bonos? O rem inquis difficilem, & inexplicabilem! Atqui explicanda est. Qui enim fieri potest? Ac ne me existimaris ad manendum esse propensorem, quod plura in ea parte verba fecerim, potest fieri, quod sit in multis quaestionibus, ut res verbosior haec fuerit, illa verior. Quamobrem ut maximam de re aequo animo deliberanti, ita mihi des consilium velim. Navis & in Caieta est parata nobis, & Brundisii. Sed ecce nuntii, scribente me haec ipsa noctu in Caleno, ecce literae, Caesarem ad Corfinium. Domitium Corfinii cum firmo exercitu, & pugnare cupiente; non puto etiam hic Cn. nostrum commissurum, ut Domitium relinquat: etsi Brundisium Scipionem cum cohortibus duabus praemisera, legionem à Fausto conscriptam in Siciliam sibi placere à Cos. duci, scripserat ad Cos. Sed turpe Domitium erit deferere implorantem eius auxilium: est quaedam spes mihi quidem non magna, sed in his locis firma; Afranium in Pyrenaeo, cum Trebonio pugnasse, pulsum Trebonium, etiam Fabium tuum transisse cum cohortibus, summa autem, Afranium cum magnis copiis adventare. Id si est, in Italia fortasse manebitur. Ego autem, cum esset incertum



LIBER TERTIVS.

incertum iter Cæsaris, quod vel ad Capuam, vel ad Lucciam, iturus putabatur. Leptam ad Pompeium misi, & literas; ipse ne quò inciderem, reverti Formias. Hæc te scire volui, scripsiq; sedatiore animo, quam proximè scripseram, nullum meum iudicium interponens, sed exquirens tuum. Vale.

IN HAC PARTE. Prius de Cæsare agit, secundo de Pompeio, in utramque partem disputans.

INFERO. Quinque rationes ponuntur cur Pompeium sequi non debeat.

AT SI. Rationes cur sequatur Pompeium. Imitabor principes viros qui patriæ bellum inferre noluerunt.

THRASYBVLVS. Atheniensis armatus accessit ad patriæ mœnia, ut eam à 30. tyrannis liberaret.

*Cicero Dolabellæ Cos. suo. S. Att. 14. 20.*

5

**E**T si contentus eram, mi Dolabella, tua gloria, satisque ex ea magnam lætitiā, voluptatemque capiebam: tamen non possum non confiteri, cumulari me maximo gaudio, quòd vulgò hominum opinio socium me ascribat tuis laudibus. Neminem conveni (convenio autem quotidie plurimos; sunt enim permulti optimi viri, qui valetudinis causa in hæc loca veniunt: præterea ex municipiis frequentes necessarii mei) quin omnes quum te summis laudibus ad cælum extulerunt, mihi continuò maximas gratias agant. Negant enim se dubitare, quin tu meis præceptis & consiliis obtemperans, præstantissimum te civem, & singularem Cos. præbeas. Quibus ego, quanquam verissimè possim respondere, te, quæ facias, tuo iudicio & tua sponte facere, nec cuiusquam egere consilio: tamen neque plane assentior, ne imminuam tuam laudem, si omnis à meis consiliis profecta videatur, neque valde nego. Sum enim avidior etiam quàm satis est, gloriæ: & tamen non alienum est à dignitate tua, quòd ipsi Agamemnoni Regi Regum fuit honestum, aliquem in consiliis capiendis Nestorem habere: mihi verò gloriosum te iuvenem Cos. florere laudibus, quasi alumnum disciplinæ meæ. L. quidem Cæsar, cum ad eum ægrotum Neapolin venissem, quanquam erat oppressus totius corporis doloribus, tamen antequam me plane salutaverat, O mi Cicero, inquit, gratulor tibi, cum tantum vales apud Dolabellam, quantum si ego apud sororis filium valerem, tum  
salvi;



## LIBER TERTIUS.

tum salvi esse possemus. Dolabellæ verò tuo, & gratulor, & gratias ago: quem quidem post te consulem, solum possem verè consulem dicere. Deinde multa de facto, ac de re gesta, tum nihil magnificentius, nihil præclarius actum unquam, nihil Reipub. salutaris testatus est: atque hæc una vox omnium est. A te autem peto, ut me hanc quasi falsam hereditate n alienæ gloriæ finas cernere, meque aliqua ex parte in societatem tuarum laudum venire patiari. Quanquam, mi Dolabella (hæc enim iocatus sum) libentius omnes meas, si modo sint aliquæ meæ laudes, ad te transtulerim, quam aliquam partem exhauserim ex tuis. Nam cum te semper tantum dilexerim quantum tu intelligere potuisti, tum iis tuis factis sic incensus sum, ut nihil unquam in amore fuerit ardentius. Nihil est enim (mihi crede) virtute formosius, nihil pulchrius, nihil amabilius. Semper amavi, ut scis, D. Brutum, propter eius summum ingenium, suavissimos mores, singularem probitatem, atque constantiam: tamen Idibus Martii tantum accessit ad amorem, ut mirarer locum fuisse augendi in eo, quod mihi iampridem cumulatam etiam videbatur. Quis erat, qui putaret ad eum amorem, quem erga te habebam, posse aliquid accedere? Tantum accessit, ut mihi nunc denique amare videar, antea dilexisse. Quare, quid est, quod ego te horter, ut dignitati & gloriæ servias? Proponam tibi claros viros, quod facere solent, qui hortantur? Neminem habeo clariorem, quam te ipsum: te imitere oportet, tecum ipse certes. Nec licet quidem tibi iam tantis rebus gestis, non tui similem esse. Quod cum ita sit, hortatio non est necessaria, gratulationem magis utendum est. Contigit enim tibi quod haud scio, an nemini, ut summa severitas animadversionis, non modo non invidiosa, sed etiam popularis esset, & cum bonis omnibus, tum infimo cuique gratissima. Hoc si tibi fortuna quadam contigisset, gratularer felicitati tuæ; sed contigit magnitudine cum animi, tum etiam ingenii atque consilii. Legi enim concionem tuam, nihil illa sapientius, ita pedetentim cum accessus à te ad causam facti, tum recessus, ut res ipsa maturitatem tibi animadvertendi omnium consensu daret. Liberaisti igitur & urbem periculo, & civitatem metu



# LIBER TERTIVS

metu. Neque solum ad tempus maximam vtilitatem attulisti; sed etiam ad exemplum. Quo facto intelligere debes in te positam Rempub. tibi que non modo tuendos, sed etiam ornandos illos viros, a quibus initium libertatis profectum est. Sed his de rebus coram plura propediem, ut spero. Tu quoniam Rempub. nosque conservas, fac ut diligentissime te ipsum, mi Dolabella, custodias. Vale.

*M. T. C. Bruto. S. ad Brutum. Epist. 3.*

6

**N**ostræ res meliore loco videbantur. Scripta enim ad te certo scio quæ gesta sunt, quales tibi sæpe scripsi, Consules, tales exstiterunt. \* Cælaris vero pueri mirifica indoles virtutis, utinam tam facile eum florentem, & honoribus, & gratia regere ac tenere possimus, quam facile adhuc tenuimus. Est omnino illud difficilius; sed tamen non diffidimus. Persuasum est enim adolescenti, & maxime per me, eius operâ nos esse salvos. Et certe nisi is Antonium ab urbe avertisset, periissent omnia. Tri-duo vero aut quatruido ante hanc rem pulcherrimam, timore quodam proculsa civitas tota ad te se cum coniugibus & liberis effundebat: eadem recreata ad 12. Kalend. Maii te huc venire, quam se ad te ire malebât; quo quidem die magnorum meorum laborum, multarumque vigiliarum fructum cepi maximum, si modo est aliquis fructus ex solida veraque gloria. Nam tantæ multitudinis, quantum capit urbs nostra, concursus est ad me factus; eâ cum usque in \*Capitolium deductus, maximo clamore atque plausu in rostris collocatus sum. Nihil est in me inane, neque enim debet. Sed tamen omnium ordinum consensus, gratiarum actio, gratulatioque me commo- vet, propterea quod popularem me esse in populi salute præclarum est. Sed hæc te malo ab aliis audire: me velim de tuis rebus, consiliisque facias diligentissime certio- rem. Illudque consideres, ne tua liberalitas dissolutior videatur. Sic sentit Senatus, sic populus Romanus, nullos unquam hosteis digniores omni supplicio fuisse, quam eos civeis qui hoc bello contra patriam arma ce- perunt: quos quidem ego omnibus sententiis ulciscor

&



& persequor, omnibus bonis approbantibus. Tu quid de hac res sentias, tui iudicii est. Ego sic sentio, trium fratrum unam & eandem esse causam. Consules duos, bonos quidem, sed duntaxat bonos amisimus. Hirtius quidem in ipsa victoria occidit, cum paucis diebus magno prælio ante vicisset. Nam Pansa fugerat vulneribus acceptis, quæ ferre non potuit. Reliquias hostium Brutus persequitur & Cæsar. Hostes autem omnes iudicati qui M. Antonii sectam secuti sunt. Itaque id Senatusconsultum plerique interpretantur etiam ad tuos, sive captivos, sive dedititios pertinere. Equidem nihil differui durius, cum nominatim de C. Antonio decernerem, quod ita statueram, à te cognoscere causam eius Senatum oportere. 10 Kalend. Maii.

CAESARIS PVERI. Bellum intelligit ad Mutinam pugnatum à Pansa, Hirtio & Cæsare Octaviano cum Antonio.

CAPITOLIVM. Vt Iovi Optimo Maximo gratias agerem, & Pansæ literas de rostris recitarem de victoria, quod soli magistratui licebat facere, privatus enim de rostris verba non faciebat.

*Brut. Cicer. ad Brut. Epist. 4.*

7

**Q**uanta sim lætitia affectus cognitis rebus Bruti nostri, & consulum, facilius est tibi existimare quam mihi scribere. Cum alia laudo & gaudeo accidisse: tum quod Bruti eruptio non solum ipsi salutaris fuit, sed etiam maximo ad victoriam adjumento. Quod scribis trium Antoniorum unam, atque eandem causam esse, quid ego sentiam, mei iudicii esse, statuo nihil, nisi hoc Senatus aut populi Romani iudicium esse de his civibus, qui pugnantes non interierint. At hoc ipsum, inquires, iniquè facis, qui hostilis animi in Rempub. homines civeis appelles, imo iustissime. Quod enim nondum Senatus censuit, nec populus Romanus iussit; id arroganter non præjudico, neque revoco ad arbitrium meum. Illud quidem non muto, quod ei, quem me occidere res non coegit neque crudeliter quicquam eripui, neque dissolute quicquam remisi, habuique in mea potestate, quoad bellum fuit. Multo quidem honestius iudico, magisque quod concedere possit Respublica, miserorum fortunam non insectari, quam infinita tribuere potentibus, quæ cupiditatem & arrogantiam incendere possint. Qua in re, Cicero vir optime,



## LIBER TERTIVS.

optime; ac fortissime, mihi que merito, & meo nomine, & Reipub. charissime, nimis credere videris spei tuæ, statimque ut quisque aliquid rectè fecerit, omnia dare, ac permittere, quasi non liceat traduci ad mala consilia corruptum largitionibus animum. Quæ tua est humanitas, æquo animo te moneri patieris, præsertim de communi salute, facies tamen quod tibi visum fuerit: etiam ego, cum me docueris. Nunc Cicero, nunc agendum est, ne frustra oppressum esse Antonium gavisi simus, neu semper primi cuiusque mali excidendi causa sit, ut aliud renascatur illo peius. Nihil iam neque opinantibus aut patientibus nobis adversi evenire potest, in quo non cum omnium culpa, tum præcipue tua futura sit, cujus tantam auctoritatem Senatus ac populus Romanus non solum esse patitur, sed etiam cupit, quanta maxima in libera civitate unius esse potest: quam tu non solum benè sentiendo, sed etiam prudenter tueri debes. Prudentia porro quæ tibi superest, nulla abs te desideratur, nisi modus in tribuendis honoribus. Alia omnia sic abunde adsunt, ut cum quolibet antiquorum comparari possint tuæ virtutes. Vnum hoc grato animo liberalique profectum, cautiorem ac moderatiorem liberalitatem desiderat. Nihil enim Senatus cuiquam dare debet, quod male cogitantibus exemplo, aut præsidio sit. Itaque timeo de consulatu, ne Cæsar tuus altius se ascendisse putet decretis tuis; quam inde, si consul factus sit; descensurum. Quod si Antonius ab alio relictum regni instrumentum occasionem regnandi habuit, quonam animo fore putas, si quis authore non tyranno interfecto, sed ipso Senatu putat; se imperia quælibet concupiscere posse. Quare tum & facilitatem & providentiam laudabo tuam, cum exploratum habere cæpero Cæsarem honoribus, quos acceperit extraordinariis, fore contentum. Alienæ igitur, inquires, culpæ me reum facies? Prorsus alienæ si provideri potuit, ne existeret. Quod utinam inspicere possis timorem de illo meum. His literis scriptis te consulem factum audivimus. Tum vero incipiam proponere mihi Rempub. iustam etiam suis nitentem viribus, si istuc videro, Filius valet, & in Macedoniam cum equitatu præmissus est. Idibus Maiis ex castris.

ITA-



LIBER TERTIVS.

ITAQUE TIMEO. Sensus est, vereor ne Cæsar cum ad hos extraordinarios honores ascendit, altius se ascendi te putet, quam sit ascensurus, si inde postea ad consulatum ascendat.

*Tull. & Cicero S. D. Tironi suo.*

*Fam. 16. 9.*

8

**N**OS à te (ut scis) discessimus ad quartum Nonas Novembr. Leucadem venimus ad octavum Idus Novembr. ad septimum Actium, ubi propter tempestatem ad sextum Idus morati sumus. Inde ad quintum Idus Corcyram bellissimè navigavimus. Corcyrae fuimus usque ad decimum sextum Kalend. Decembr. tempestatibus retenti. Ad decimum quintum Kalend. Decembr. à portu Corcyraeorum, ad Cassiopen stadia 120 processimus. Ibi retenti ventis fuimus, usque ad Nonum Kalend. Interea qui cupidè profecti sunt, multi naufragia fecerunt. Nos eo die coenati solvimus. Inde Austro lenissimo, cælo sereno nocte illa, & die postero in Italiam ad Hydruntem ludibundi pervenimus, eodemque vento postridie (id erat ad septimum Kalend. Decembr.) hora quarta Brundisium venimus. Eodem tempore simul nobiscum oppidum introiit Terentia, quæ te facit plurimi. Ad quintum Kalend. Decembr. servus Cn. Planci Brundisii tandem aliquando mihi à te expectatissimas literas reddidit, datas Idibus Novembris, quæ me molestia valde levârunt, utinam omninò liberassent. Sed tamen Asclapo medicus planè confirmat propediem te valentem fore. Nunc quidem ego te hortor, ut omnem diligentiam adhibeas ad convalescendum. Tuam prudentiam, temperantiam, amorem erga me novi. Scio te omnia facturum, ut nobiscum quamprimum sis, sed tamen ita velim, ut ne quid properes. \* Symphoniam Lysonis velim vitasses, ne in quartam hebdomadam incideres. Sed quando pudori tuo maluisti obsequi, quam valetudini, reliqua cura. Curio \* misit, ut medico \* honos haberetur, & tibi daret, quod opus esset: me, cui iussisset, curaturum. Equum & Mulum Brundisii tibi reliqui. Romæ vereor, ne ex Kalend. Ian. magni tumultus sint. Nos agemus omnia modicè. Reliquum est, ut hoc te rogem, & à te petam, ne temerè naviges. Solent nautæ festinare, quæstus



### LIBER TERTIVS.

quæstus sui causa. Cautus sis, mi Tyro, mare magnum & difficile tibi reseat. Si poteris, cum Mescinio: (cautè is solet navigare.) Si minus cum honesto aliquo homine, cuius authoritate navicularius moveatur. In hoc omnem diligentiam si adhibueris, teque nobis incolumem \* stiteris, omnia à te habeo. Etiam atque etiam noster Tyro vale. Medico, Curio, Lysoni de te scripsi diligentissimè. Vale.


**SYMPHONIAM.** Per translationem obsequium significat, nempe quod in re aliqua valetudini infesta obsecutus sit Lysoni.

**MISI.** Pro mandavi. Attic. Lib. 13. Epist. 7. Misi equidem ei nunciare te ejus adventum expectare.

**HONOS.** Pecunia daretur, unde præmium honoris causa datum honorarium vocatur.

**STITERIS.** Rectè pro incolumem dederis vel obtuleris.

*FINIS LIBRI TERTII.*



LIBER





# LIBER QVARTVS.

*Cicero Servio Sulpitio S. D.*

*Fam. l. b. 13. Epist. 17.*

I

**M**anius Curius, qui Patris negotiatur, multis & magnis de causis à me diligitur. Nam & amicitia pervetus mihi cum eo est, ut primum in forum veni, instituta, & Patris cum aliquoties antea, tum proximè hoc miserrimo bello, domus ejus tota mihi patuit: qua si opus fuisset, tam essem usus quam mea. Maximum autem mihi vinculum cum eo est, quasi sanctioris cujusdam necessitudinis, quod est Attici nostri familiarissimus, cumque unum præter cæteros observat & diligit. Quem si tu jam forte cognovisti, puto me hoc, quod facio, facere seriùs. Ea enim est humanitate, & observantia, ut eum tibi jam ipsum per se commendatum putem. Quod tamen si ita est, magnopere à te quæso ut ad eam voluntatem, si quam in illum ante has meas literas contulisti, quam maximus postea commendatione nostra cumulus accedat. Sin autem propter verecundiam suam minus se tibi obtulit, aut eum nondum habes satis cognitum, aut quæ causa est, cur majoris commendationis indigeat; sic tibi eum commendo, ut neque maiore studio quenquam, neque iustioribus de causis commendare possim. Faciamque id quod debent facere ii, qui religiosè, & sine ambitione commendant: spondebo enim tibi, vel potius spondeo, in meque recipio, eos esse M. Curii mores, eamque probitatem, tum etiam humanitatem, ut eum & amicitia tua, & tam accurata commendatione, si tibi sit cognitus, dignum sis existimaturus. Mihi certe gratissimum feceris, si intellexero has literas tantum, quantum scribens confidebam, apud te pondus habuisse. Vale.

MANIVS. A mane prænomen, sicut Lucius à luce.

*Cicero*



**Q**UO magis quotidie ex literis nunciisque bellum magnum esse in Syria cognosco, eo vehementius à te pro nostra necessitudine contendo, ut mihi M. Anneium legatum, primo quoque tempore remittas. Nam eius opera, consilio, scientia rei militaris, vel maxime intelligo me & rempub. adjuvari posse. Quod nisi tanta res ejus ageretur, nec ipse adduci potuisset, ut à me discederet, neque ego, ut eum à me dimitterem. Ego in Ciliciam proficisci cogito circiter Kalend. Maii. Ante eum diem Anneius ad me redeat oportet. Illud quod tecum & coram, & per literas diligentissime egi, id & nunc etiam atque etiam rogo, curæ sit tibi, ut suum negotium quod habet cum populo Sardiniano, pro causæ veritate, & pro sua dignitate conficiat. Intellexi ex tua oratione, cum tecum Ephesi locutus sum, te ipsius M. Anneii causa omnia velle. Sed tamen, sic velim existimes, te mihi nihil gratius facere posse, quam si intellexero, per te illum ipsum negotium ex sententia confecisse. Idque quamprimum ut efficias, te etiam atque etiam rogo. Vale.

*Cicero S. D. Silio Propræt. Fam. 13. 63.* 3

**N**ON putavi fieri posse, ut mihi verba deessent: sed tamen in M. Lænio commendando desunt. Itaque rem tibi exponam paucis verbis, sed tamen ut plane perspicere possis voluntatem meam. Incredibile est, quanti faciamus, & ego & frater meus, qui mihi carissimus est, M. Lænium. Id fit cum plurimis ejus officiis, cum summa ejus probitate & singulari modestia. Eum ego à me invictissimus dimisi, tum propter familiaritatem, & consuetudinis suavitatem; cum quod consilio ejus fideli, ac etiam bono libenter utebar. Sed vereor, ne iam mihi superesse verba putes, quæ dixeram defutura. Commendo tibi hominem, sicut intelligis me, de quo ea supra scripserim, debere commendare. A teque vehementer etiam atque etiam peto, ut, quod habet in tua provincia negotii, expedias, quod tibi videbitur rectum esse psi dicas. Hominem facillimum liberalissimumque cognosces. Itaque te rogo



rogo, ut cum solutum, liberum, confectis eius negotiis per te quamprimum ad me remittas. Id mihi, fratrique meo gratissimum feceris. Vale.

*Tul. & Cic. Terent. Tul. 2. 2. S.D. Tironi. Fam. 16. 10 4*

**E**tsi opportunitatem operę tuę omnibus locis desidero: tamen non tam mea, quàm tua causa doleo, te non valere. Sed quando in quartanam conversa est vis morbi, (sic enim scribit Curius) spero te diligentia adhibita etiam firmiorem fore. Modo fac id, quod humanitatis tuę est, nequid aliud cures hoc tempore nisi ut quam commodissime convalescas. Non ignoro quantum ex desiderio labores: sed erunt omnia facilia, si valebis. Festinare te nolo, ne nausę molestiam suscipias æger, & periculose hyeme naviges. Ego ad urbem accessi Prid. Non. Ian. obviam mihi sic est proditum, ut nihil fieri potuerit honoratius. Sed incidi in ipsam flammam civilis discordiæ, vel potius belli, cui cum cuperem mederi, & ut arbitror, possem, cupiditates certorum hominum (nam ex utraque parte sunt, qui pugnare cupiant) impedimento mihi fuerunt. Omnino & ipse Cęsar amicus noster, minaces ad Senatum, & acerbis literas miserat, & erat adhuc impudens, qui exercitum, & provinciam invito Senatu teneret, & Curio meus illum incitabat. Antonius quidem noster & Qui. Cassius nulla vi expulsi ad Cæsarem cum Curione profecti erant. Posteaquam Senatus consulibus, prætoribus, tribunis plebis & nobis (qui proconsules sumus) negotium dederat, ut curaremus, ne quid Respub. detrimenti caperet, nunquam maiore in periculo civitas fuit, nunquam improbi cives habuerunt paratiorem ducem. Omnino ex hac quoque parte diligentissime ad bellum comparatur. Id fit autoritate & studio Pompeii nostri, quod Cæsarem sero cœpit timere. Nobis inter has turbas Senatus frequens flagitavit triumphum, sed Lentulus consul quo maius suum beneficium faceret, simulatque expedisset, quę essent necessaria de Respub. dixit se relaturum. Nos agimus nihil cupidè, eoque est nostra pluris autoritas. Italię regiones descriptę sunt, quam quisque partem tueretur. Nos Capuam sumpsimus. Hęc te scire volui. Tu etiam atque etiam cura ut valeas, literasque  
ad



ad memittas, quotiescunque habebis cui des. Etiam atque etiam Vale. Dat. Prid. Idus Ian.

*M. Cic. Imp. S. D. Cn. Magno. Proc. Att. 8. 15. 5*

**Q**Vum ad te literas misissem, quæ tibi Canusii redditæ sunt, suspicionem nullam habebam, te Reipublicæ causa, mare transiturum, eramque in spe magna, fore ut in Italia possemus, aut concordiam constituere, qua mihi nihil utilius videbatur, aut Rem publicam summa cum dignitate defendere. Interim nondum meis literis ad te perlatis, ex iis mandatis quæ Decio Ælio ad Cos. dederas, certior tui, consilii factus, non expectavi, dum mihi a te literæ redderentur: confestim cum Qu. fratre, & cum liberis nostris iter ad te in Apuliam facere cœpi. Cum Theanum Sidicinum venissem, C. Messius familiaris tuus mihi dixit aliique complures, Cæsarem iter habere Capuam, & eo ipso die mansurum esse Æserniæ. Sane sum commotus: quod si ita esset, non modo iter meum interclusum, sed meipsum plane exceptum putabam. Itaque tum Cales processi, ut ibi potissimum consisterem, dum certum nobis ab Æsernia de eo, quod audieram, referretur: at mihi, cum Calibus essem, affertur literarum tuarum exemplum, quas tu ad Lentulum Cos. misisses. Hæ scriptæ sic erant: literas tibi à L. Domitio ad 14. Kalend. Mart. allatas esse earumque exemplum subscripseras, magnique interesse Reipubl. scripseras, omnes copias primo quoque tempore in unum locum convenire, & ut præsidii quod satis esset Capuæ relinqueret. His ego literis lectis, in eadem opinione fui, qua reliqui omnes, te cum omnibus copiis ad Corfinium esse venturum, quo mihi, cum Cæsar ad oppidum castra haberet, tutum iter esset non arbitrabar. Cum res in summa expectatione esset, utrumque simul audivimus, & quæ Corfinii acta essent & te iter Brundisium facere cœpisse. Cumque nec mihi, nec fratri meo dubium esset, quin Brundisium contendere-mus, a multis, qui è Samnio, Apuliaque veniebant, admoniti sumus, ut caveremus, ne exciperemur à Cæsare, quod is in eadem loca, quæ nos petebamus, profectus celerius etiam quam nos possemus, eo quo intenderat, venturus esset, quod cum ita esset, nec mihi, nec fratri meo, nec cuiquam



cuiquam amicorum placuit committere, ut temeritas nostra non solum nobis, sed etiam Reipub. noceret: cum præsertim non dubitaremus quin, si etiam nobis tutum iter fuisset, tamen iam consequi non possemus. Interim primo accepimus tuas literas Canusio ad 10. Kalen. Mart. datas, quibus nos hortaris, ut celerius Brundisium veniamus: quas cum accepissemus, ad tertium Kalend. Mart. non dubitabamus, quin tu jam Brundisium pervenisses, nobisque iter illud omnino interclusum videbamus, neque minus nos esse captos quam qui Corfinium venissent. Neque enim eos solos arbitrabamur capi qui in armatorum manus incidissent, sed eos nihilominus, qui regionibus exclusi, intra præsidia atque intra arma aliena venissent. Quod cum ita sit, maxime vellem primum tecum semper fuisset, quod quidem tibi ostenderam, cum à me Capuam rejiciebam. Quod feci non vitandi oneris causa, sed quod videbam teneri illam urbem sine exercitu non posse: accidere autem mihi nolebam, quod doleo  
 \* viris fortissimis accidisse. Quoniam autem tecum ut essem non contigit, utinam tui consilii certior factus essem: nam suspicione assequi non potui, quod omnia prius arbitratus sum fore, quam ut hæc Reipub. causa in Italia non posset duce te consistere. Neque vero nunc consilium tuum reprehendo, sed fortunam Reipub. lugeo. Nec, si ego quid tu sis secutus non perspicio, idcirco minus existimo te nihil nisi summa ratione fecisse. Mea quæ semper fuerit sententia, primum de pace vel iniquâ conditione retinendâ, deinde de urbe (nam de Italia quidem nihil mihi unquam ostenderas) meminisse te arbitror. Sed mihi non sumo, ut meum consilium valere debuerit: secutus sum tuum; neque id Reipub. causâ, de qua desperavi, quæ & nunc afflicta est, nec excitari sine civili perniciosissimo bello potest; sed te quærebam, tecum esse cupiebam, neque eius rei facultatem, si qua erit, prætermittam. Ego me in hac omni causa facile intelligebam, pugnandi cupidis hominibus non satisfacere. Primum enim præ me tui me nihil malle quam pacem: non quia eadem timerem, quæ illi, sed ea bello civili leviora ducebam. Inde suscepto bello cum pacis conditiones ad te adferri, à teque ad ea honorifice,



LIBER QVARTVS.

cē, & largē responderi viderem, \* duxi meam rationem, quam tibi facile me probaturum pro tuo in me beneficio arbitrabar. Memineram me esse unum, qui meis maximis in reipublicam meritis, supplicia miserrima & crudelissima pertulissem: me esse unum, qui si offendissem ejus animum, cui, tum cum jam in armis essemus, Consulatus tamen alter & triumphus amplissimus deferrebat, subjicerer iisdem praeliis, ut mea persona semper ad improborum impetus aliquid videretur habere \* populare. Atque hæc non ego prius sum suspicatus, quam mihi palam denunciata sunt: neque ea tam pertimui, si subeunda essent, quam declinanda putavi, si honestè vitare possem. Quam brevissimam illius temporis, dum in spe pax fuit, rationem nostram vides, \* reliqui facultatem res ademit. Iis autem quibus non satisfacio, facile respondeo, neque enim ego amicior C. Cæsari unquam fui, quam illi: neque illi amiciores reipublicæ quam ego. Hoc inter me & illos interest, quod cum & illi cives optimi sint, & ego ab ista laude non absim, ego conditionibus, quod idem te intellexeram velle, illi armis discceptari maluerunt. Quæ quoniam ratio omissa est: perficiam profectò, ut neque respublica civis à me animum, neque tu amici desideres.

VIRIS FORTISS. Domitio, Lentulo, Vibullio, aliisque qui in Cæsaris potestatem venerunt.

DVXI MEAM. Hoc cogitavi me non debere Cæsaris animum offendere.

POPVLARE. Ut unus ego deligerer in quem improbi cives impetum facerent.

RELIQVI. Ut rebus desperatis ad te non venirem, nec enim licuit.

*Cn. Magn. Proc. M. Marcel. L. Lent.*

*Cos. S. D. Attic. 8. 17.*

6

**E**GO, quod existimabam dispersos nos neque reipublicæ utiles, neque nobis præsidio esse posse, idcirco ad L. Domitium literas misi: primum ut ipse cum omni copia ad nos veniret: si de se dubitaret, ut cohorteis novemdecim, quæ ex Piceno ad me iter habebant, ad nos mitteret. Quod veritus sum, factum est, ut Domitius implicaretur, neque ipse satis firmus esset ad castra faciendā, quod meas novemdecim,

E

&



LIBER QVARTVS.

& suas duodecem cohorteis tribus in oppidis distributas haberet (nam partim Albę, partim Sulfone collocavit) neque, si vellet, expedire posset. Nunc scitote me esse in summa solitudine, nam & tot & tales viros periculo obsidionis liberare cupio: neque subsidio ire possum, quod his duabus legionibus non puto esse committendum, ut illuc ducantur. ex quibus tamen non amplius quatuordecem cohorteis contrahere potui, quas Brundisium misi: neque Canusium sine præsidio, dum abessem, putavi esse dimittendum. Dello mandāram, quod maiores copias sperabam nos habituros, ut, si vobis videretur, alteruter vestrum ad me veniret, alter in Siciliā cum ea copia, quam Capuę, & circum Capuam comparastis, & cum iis militibus, quos Faustus legit, proficisceretur: Domitius, cum duodecem suis cohortibus eodem adiungeretur: reliquę copię omnes Brundisium cogerentur, & inde navibus Dyrrhachium transportarentur. Nunc cum hoc tempore nihilo magis ego quā vos subsidio Domitio ire possum, seu per montes explicare, non est nobis committendum, ut ad has quatuordecem cohorteis quas dubio animo habeo, hostis accedere, aut in itinere me consequi possit. Quamobrem placitum est mihi (aliter video censeretur C. Marcello, & ceteris nostri ordinis, qui hīc sunt) ut Brundisium ducerem hanc copiam, quam mecum habeo. Vos hortor, ut quodcunque militum contrahere poteritis, contrahatis, & eodem veniatis quamprimum. Arma quę ad me missuri eratis, iis censeo armetis milites, quos vobiscum habetis: quę arma superabunt, ea si Brundisium iumentis deportaveritis, vehementer Reipublicę profueritis. De hac re vellem nostros certiores feceritis. Ego ad P. Lupum & C. Coponium Prætores misi, ut se vobis conjungerent, & militum quod haberent, ad vos deducerent. Vale.

*Cicero Mario. S. D. Fam. Lib. 7. Epist. 3.*

**P**ersæpe mihi cogitanti de communibus miseriis, in quibus tot annos versamur, & (ut video) versabimur, solet in mentem venire illius temporis, quo proxime fuimus una, quinetiam ipsum diem memoria teneo. Nam ad tertium idus Maias Lentulo & Marcello Coss. cum in Pompeianum vesperi venissem tu mihi sollicito animo præsto fuisti. Soli-



tum autem te habebat cogitatio tum officii, tum etiam periculi mei. Si manerem in Italia, vercbare ne officio deessem: si proficiscerer ad bellum, periculum te mecum commovebat. Quo tempore vidisti profecto me quoque ita conturbatum, ut non explicarem quid esset optimum factu: pudori tamen malui, famæque cedere, quam salutis meæ rationem ducere. Cuius me mei facti poenituit, non tam propter periculum meum, quam propter vitia multa, quæ ibi offendi quo veneram. Primum neque magnas copias, neque bellicosas: deinde, extraducem, paucosque præterea (de principibus loquor) reliqui primum in ipso bello rapaces, deinde in oratione ita crudeles, ut ipsam victoriam horrerem: maximum autem æs alienum amplissimorum virorum. Quid quaeris? Nihil boni præter causam. Quæ cum vidissem, desperans victoriam, primum cœpi suadere pacem, cuius fueram semper auctor, deinde cum ab ea sententia Pompeius valde abhorreret, suadere institui, ut bellum duceret. Hoc interdum probabat, & in ea sententia videbatur fore, & fuisset fortasse, nisi quadam ex pugna cœpisset suis militibus confidere. Ex eo tempore vir ille summus, nullus imperator fuit. Signa tirone, & collectio exercitu cum legionibus robustissimis contulit: victus turpissimè, amissis etiam castris, solus fugit. Hunc ego belli mihi finem feci: nec putavi, cum integri pares non fuisset, fractos superiores fore. Discessi ab eo bello, in quo aut in acie cadendum fuit, aut in aliquas insidias incidendum, aut deveniendum in victoris manus, aut ad Iubam confugiendum, aut capiendus tanquam exilio locus, aut consciscenda mors voluntaria. Certè nihil fuit præterea si te victori nolles aut non auderes committere. Ex omnibus autem iis quæ dixi incommodis, nihil tolerabilius exilio, præsertim innocenti, ubi nulla adiuncta est turpitude, addo etiam cum ea urbe careas in qua nihil sit quod videre possis sine dolore. Ego cum meis (si quicquam nunc cuiuspiam est) etiam in meis esse malui. Quæ acciderunt, omnia dixi esse futura. Veni domum, non quod optima vivendi conditio esset: sed tamen si esset aliqua forma reipublicæ, tanquam in patria ut essem: si nulla tanquam in exilio. Mortem



mihi cur consciscerem, causa non visa est: cur optarem; multæ. Vctus est enim: ubi non sis, qui fueris, non esse cur velis vivere. Sed tamen vacare culpa magnum est solatium; præsertim cum habeam duas res, quibus me sustentem, optimarum artium scientiam, & maximarum rerum gloriam: quarum altera mihi vivo nunquam eripietur, altera me mortuo quidem. Hæc ad te scripsi verbosius, & tibi molestus fui, quod te, cum mei, tum Reipublicæ cognovi amantissimum. Notum tibi omne consilium meum esse volui, ut primum scires, me nunquam voluisse plus quenquam posse, quam vniversam Rempublicam; postea autem quam alicujus culpa tantum valeret unus, ut obstiti non posset, me voluisse pacem: amisso exercitu, & eo duce, in quo spes fuerat uno, me voluisse etiam reliquis omnibus: postquam non potuerim, mihi ipsi finem fecisse belli: nunc autem si hæc civitas est, civem esse me, si non, exulem esse non incommodiore loco quam si me Rhodum aut Mitylenas contulissem. Hæc tecum coram mahieram: sed quia longius fiebat, volui per literas eadem, ut haberes quid diceres, si quando in vituperatores meos incidisses. Sunt enim, qui cum meus interitus nihil fuerit Reipublicæ profuturus, criminis loco putent esse, quod vivam. Quibus ego certo scio non videri satis multos periisse, qui si me audissent, quamvis iniqua pace honestè tamen viverent: armis enim inferiores, non causa fuissent. Habes Epistolam verbosio rem fortasse quam velles: quod tibi ita videri putabo, nisi mihi longiorem remiseris. Ego si, quæ volo, expediero brevi tempore te, ut spero, videbo. Vale.

*Cic. M. Marcel. S. D. Fam. Lib. 4. Epist. 7.*

7

**E**T si eo te adhuc usum consilio intelligo, ut id reprehendere non audeam (Non quin ab eo ipse dissentiam: sed quod eate sapientia esse iudicem, ut meum consilium non anteponam tuo) tamen & amicitiae nostræ vetustas, & tua summa erga me benevolentia, quæ mihi jam à pueritia tua cognita est, me hortata est, ut ea scriberem ad te, quæ & saluti tuæ conducere arbitrarer, & non aliena esse ducerem à dignitate. Ego cum te esse, qui horum malorum initia multo ante videris, consulum magnificentissime  
arque



## LIBER QVARTVS.

atque optimè gesseris, præclarè meminì: sed idem etiam illa vidi, neque te consilium civilis belli ita gerendi, neque copias Cn. Pompeii, nec genus exercitus probare, semperq; summè diffidere: qua in sententia me quoque fuisse, memoria tenere te arbitror. Itaque neque tu multum interfuisti rebus gerendis, & ego id semper egi, ne interessèm. Non enim iis rebus pugnabamus, quibus valere poteramus; consilio authoritate, causa, (quæ erant in nobis superiora:) sed laceratis, & viribus, quibus pares non eramus. Victi sumus igitur, aut, si dignitas vinci non potest fracti certè & abiecti. In quo tuum consilium nemo potest, non maxime laudare, quod cum spe vincendi, simul abiecasti certandi etiam cupiditatem, ostendisti que sapientem & bonum civem initia belli civilis invitum suscipere, extrema non libenter persequi. Qui non idem consilium, quod tu secuti sunt, eos video in duo genera esse distractos. Aut enim renovare bellum conati sunt, hique se in Africam contulerunt, aut quemadmodum nos, victori sese crediderunt. Medium quoddam tuum consilium fuit, qui hoc fortasse humilis animi duceres, illud pertinacis. Fateor à plerisque vel dicam ab omnibus, sapiens tuum consilium, à multis etiam magni ac fortis animi iudicatum, sed habet ista ratio, (ut mihi quidem videtur) quendam modum, præfertim cum tibi nihil deesse arbitrer, ad tuas fortunas omnes obtinendas, præter voluntatem. Sic enim intellexi; nihil aliud esse, quod dubitationem afferret ei, penes quem est potestas, nisi quod vereretur, ne tu illud beneficium omninò non putares. De quo quid sentiam nihil attinet dicere, cum appareat ipse quid fecerim. Sed tamen si jam ita constituisses, ut abesse perpetuo mallet, quàm ea quæ nolles videre, tamen id cogitare deberes, ubicunque esses, te fore in ejus ipsius, quem fugeres, potestate. Qui si facile passurus esset te carentem patria & fortunis tuis quietè & liberè vivere, cogitandum tibi tamen esset Romæne & domi tuæ cujusmodi res esset, an Mitylenis, an Rhodi mallet vivere. Sed cum ita latè pateat ejus potestas, quem veremur, ut terrarum orbem complexa sit, nonne mavis sine periculo domi tuæ esse quàm cum periculo alienæ? Equidem etiam si oppetenda mors es-



set, domi atque in patria malle, quam in externis atque alienis locis. Hoc idem omnes qui te diligunt, sentiunt; quorum est magna pro tuis maximis clarissimisque virtutibus multitudo. Habemus etiam rationem rei familiaris tuæ, quam dissipari nolumus; nam etsi nullam potest accipere injuriam, quæ futura sit perpetua; propterea quod neque is qui tenet rem publicam pateretur; neque ipsa res publica; tamen impetum prædonum in tuas fortunas fieri nolo. Ii autem qui essent auderem scribere, nisi te intelligere confiderem. Hic te unius sollicitudines, unius etiam multæ & assiduæ lachrymæ C. Marcelli fratris optimi deprecantur, nos cura, & dolore proximi sumus, precibus tardiores, quod jus adeundi, cum ipsi deprecatore egerimus, non habemus. Gratia tantum possumus, quantum visi. Sed tamen consilio, studio, Marcello non desumus: à tuis reliquis non adhibemur, ad omnia parati sumus. Vale.

*M. Marcel. Cicer. S. D. Fam. lib. 4. Epist. 11.* 9

**P**Lurimum valuisse apud me tuam semper auctoritatem, cum in omni re, tum in hoc maxime negotio potes existimare: cum mihi C. Marcellus frater amantissimus mei, non solum consilium daret, sed precibus quoque me obsecraret, non prius mihi persuadere potuit quam tuis est effectum literis, ut uterer vestro potissimum consilio. Res quemadmodum sit acta, vestrae literæ mihi declarant. Gratulatio tua, etsi est mihi probatissima, quod ab optimo sit animo, tamen hoc mihi multo jucundius est, & gratius, quod in summa paucitate amicorum, propinquorum, ac necessariorum, qui verè meæ saluti faverent, te cupidissimum mei, singularemque benevolentiam mihi præstitisse cognovi. Reliqua sunt ejusmodi, quibus ego, quoniam hæc erant tempora, facile, & æquo animo carebam. Hoc verò ejusmodi esse statuo, ut sine talium virorum & amicorum benevolentia, neque in adversa neque in secunda fortuna quisquam vivere possit. Itaque in hoc ego mihi gratulor tu vero ut intelligas homini amicissimo te tribuisse officium, re tibi præstabo. Vale.

*Ser. Sulp. Cic. S. D. Fam. 4. lib. 12.*

10

**E**T si scio non iucundissimum nuncium me vobis allaturum; tamen quoniam casus & natura in bonis dominatur,



# LIBER QVARTVS.

minatur, visum est faciendum, quoquo modo res sese haberet, vos certiores ut facerem. Ad decimum Kalend. Iunii, cum ab Epidauro Piræum navi advectus essem, ibi Marcellum collegam nostrum conveni, eumque diem ibi consumpsi, ut cum eo essem. Postero die, cum ab eo digressus essem, eo consilio, ut ab Athenis in Bœotiam irem, reliquamque jurisdictionem absolverem: ille, uti aiebat, supra Maleas Italiam versus navigaturus erat. Postridie ejus diei, cum ab Athenis proficisci in animo haberem, circiter horam decimam noctis, Posthumus familiaris ejus ad me venit, & mihi nunciavit, Marcum Marcellum collegam nostrum post cœnæ tempus à P. Magio Cilone familiari ejus pugione percussum esse, & duo vulnera accepisse: unum in stomacho, alterum in capite secundum aërem, sperare tamen cum vivere posse: Magium seipsum interfecisse: postea se à Marcello ad me missum esse, qui hæc nunciaret, & rogaret, uti cogerem medicos. Coegi, & è vestigio eò sum profectus prima luce. Cùm non longè à Piræo abessem, puer Acidini obviam mihi venit cum codicillis, in quibus erat scriptum, paulò ante lucem Marcellum diem suum obiisse. Ita vir clarissimus ab homine teterrimo, acerbissima morte est affectus; & cui inimici propter dignitatem pepercerant, inventus est amicus qui ei mortem afferret. Ego tamen ad tabernaculum ejus perrexì: inveni duos libertos, & pauculos servos: reliquos aiebant profugisse metu perterritos, quod\* dominus eorum ante tabernaculum interfectus esset. Coactus sum in eadem illa lectica, qua ipse delatus eram, meisque lecticariis in urbem eum referre, ibique pro ea copia, quæ Athenis erat, funus ei satis amplum faciendum curavi. Ab Atheniensibus locum sepulturæ intra urbem ut darent impetrare non potui: quod religione se impediri dicerent, neque tamen id ante cuiquam oncesserant. Quod proximum fuit, ut in quo vellemus gymnasio eum sepeliremus, nobis permiserunt. Nos in nobilissimo orbis terrarum gymnasio Academia locum delegimus: ibique eum combussimus: posteaque curavimus, ut idem Athenienses in eodem loco monumentum ei marmoreum faciendum locarent. Ita quæ no-



stra officia fuerunt, pro collegio & propinquitate, & vi-  
vo & mortuo omnia ei præstitimus. Vale. Datæ Prid. Ka-  
lend. Iun. Athenis.

CILONE. Cognomentum Magiorum. Festus dictos asserit ab e-  
minentiore frone vel à capite oblongo.

DOMINVS. Servis etenim capitale erat dominum non defendis-  
se, unde Syllanum Senatusconsult. Tacitus his lib. 14.

INTRA VRB. Solonis lege vetitum, & lege duodecim Tabula-  
rum: In urbe ne sepelito, neve urito. Paus. docet sua ætate nullum  
in urbe sepulchrum.

GYMNASIO. Tria erant Athenis, Lycæum, Cynosarges, Aca-  
demia. Academiam Plato, Lycæum nobilitavit Aristoteles, olim  
Palæstritarum loca, postea Sophorum.

COLLEGIO. Collegii causa, quia Consules unà fuere.

*Cicer. 2. Ligario S. D. Fam. 6. 13.*

II

**E**T si tali tuo tempore, me aut consolandi, aut iuvandi  
tui causa, scribere ad te aliquid pro nostra amicitia oportebat;  
tamen adhuc id non feci, quia neque lenire videbar  
oratione, neque levare posse dolorem tuum. Postea verò  
quàm magnam spem habere cœpi, fore, ut te brevi tempore  
incolumem haberemus, facere non potui, quin tibi & sen-  
tentiam & voluntatem declararem meam. Primum igitur  
scribam, quod intelligo & perspicio, non fore in te Cæsa-  
rem duriores. Nam & res eum quotidie & dies, & opinio ho-  
minum, & ut mihi videtur, etiam sua natura mitiorem facit:  
idque cum de reliquis sentio, tum de te etiam audio ex fami-  
liarissimis ejus, quibus ego, ex eo tempore, quo primum ex  
Aphrica nuntius venit, supplicare unà cum fratribus tuis non  
destiti, quorum quidem & virtus, pietas & amor in te singu-  
laris, & assidua & perpetua salutis tuæ cura tantum proficit,  
ut nihil sit, quod non ipsum Cæsarem tributurum existimem,  
etsi tardius sit quam volumus. Magnis occupationibus ejus à  
quo omnia petuntur, aditus ad eum difficiliore fuerunt, &  
simul, Aphricanæ causæ iratior, diutius velle videtur eos ha-  
bere sollicitos, à quibus se diuturnioribus putat esse molestiis  
conflictatum? Sed hoc ipsum intelligimus eum quotidie re-  
missius & placatius ferre. Quare mihi crede, & memoriæ  
manda, me tibi id affirmasse, te in istis molestiis diutius non  
futurum. Quando quid sentirem exposui, quid velim tua  
causa,



causa re potius declarabo quàm oratione. Et, si tantùm possem, quantum in ea republica de qua ita meritus sum, ut tu existimas, posse debebam, ne tu quidem in istis incommodis esses. Eadem enim causa opes meas fregit, quæ tuam salutem in discrimen adduxit. Sed tamen quicquid imago veteris meæ dignitatis, quicquid reliquæ gratiæ valebunt, studium, consilium, opera, gratia, fides mea nullo loco deerit tuis optimis fratribus. Tu fac habeas fortem animum, quem semper habuisti, primum ob eas causas, quas scripsi, deinde quod ea de republica semper voluisti, atque sensisti, ut non modò secunda sperare debeas; sed etiam, si omnia aduersa essent, tamen & conscientia & factorum, & consiliorum tuorum, quęcunque acciderent fortissimo, & maximo animo terre deberes. Vale.

*Cicero Ligario S. D. Fam. 6. 14*

12

**M**E scito omnem meum laborem, omnem operam, curam, studium in tua salute consumere. Nam cùm te semper maximè dilexi, tum fratrum tuorum, quos æquè atque te summa benevolentia sum complexus, singularis pietas, amorque fraternus, nullum me patitur officii erga te, studiique munus aut tempus prætermittere. Sed quæ faciam, fecerimque pro te, ex illorum te literis quàm ex meis malo cognoscere. Quod autem sperem, aut confidam & exploratum habeam de salute tua id tibi à me declarari volo. Nam si quisquam est timidus in magnis periculosisque rebus, semperque magis aduersos rerum exitus metuens, quam sperans secundos, is ego sum: & si hoc vitium est, eo me non carere confiteor. Ego idem tamen cum \* ad secundum Kal. intercalareis priores, rogatu fratrum tuorum venissem manè ad Cæsarem, atque omnem adeundi, & conveniendi illius indignitatem, & molestiam pertulissem, cum fratres & propinqui tui jacerent ad pedes, & ego essem locutus, quæ causa, quæ tempus tum postulabat, non solùm ex oratione Cæsaris, quæ sanè mollis & liberalis fuit, sed etiam ex oculis & vultu, & multis prætereà signis, quæ facilius perspicere potui quàm scribere, hanc in opinionem discessi, ut mihi tua salus dubia non esset. Quamobrem fac animo magno fortique sis, etsi turpidissima sapienter ferebas, tranquilliora



LIBER QVARTVS.

quilliora latè feras. Ego tamen tuis rebus sic adere, ut difficillimis: neque Cæsari solum, sed etiam amicis eius omnibus, quos mihi amicissimos esse cognovi, pro te, sicut adhuc feci, libentissime supplicabo. Vale.

AD .2. KALEND, INTERCAL. Spinofus locus si quis alter in Cicerone, Vide Ald. Manut. Pauli filium, de quaestis per Epistolam ubi intercalationem Numæ explicat, & C. Cæsaris pluribus verbis Inter Novembrem enim & Decembrem duos alios menses interjiciebant, adeo ut quindecim mensium cum intercalari esset annus Et dies mensis Novembris, qui Kalendarum Decembrium nomine vulgo vocantur, absque Decembris mentione dicti sunt Kalendarum intercalarium priorum nomine. 14. Novemb. dicebatur 17. Kalend. intercalares priores. 15. dictus 16. Kalend. intercalares priores: & sic ad ultimum Novemb. diem qui dicitur. 2. Kalend. intercalares priores; Dies cuius hic mentio.

*Brut. Imp. Cos. Des. S. D. Cic. Fam. II. 13. 13*

**I**Am non ago tibi gratias. Cui enim re vix referre possum, huic verbis non patitur res satisfieri. Attendere te volo quæ in manibus sunt. Qua enim prudentia es, nihil te fugiet si meas literas diligenter legeris. Sequi confestim Antonium his de causis, Cicero, non potui: eram sine equitibus, sine iumentis. Hirtium periisse nesciebam, Cæsari non credebam prius, quam convenissem, & collocutus essem. Hic dies hoc modo abiit. Postridiè manè à Panfa sum accersitus Bononiam. Cum in itinere essem, nunciatum mihi est cum mortuum esse. Recurri ad meas copias. Sic enim vere eas appellare possum. Sunt extenuatissimæ, & inopia omnium rerum pessimè acceptæ. B. duo me Antonius antecessit, itinere multo maiore fugiens, quàm ego sequens. Ille enim it passim, ego ordinatim, quacunque ivit, ergastula solvit, homines abripuit, constitit nusquam prius, quam ad Vada venit. Quem locum volo tibi esse notum. Iacet inter Appenninum & Alpeis, impeditissimus ad iter faciendum. Cùm abessem ab eo millia passum triginta, & se iam Ventidio coniunxisset, concio eius ad me est allata, in qua petere cœpit à militibus, ut se trans Alpeis sequerentur, sibi cum Marco Lepido convenire. Succlamatum est, & frequenter à militibus Ventidians, (nàm suos valde quam paucos habet) sibi aut in Italia percundum esse aut vincendum. Etiam orare cœperunt, ut Pol-

lentiam



lentiam iter facerent. Quum sustinere eos non posset, in posterum diem iter suum contulit. Hac rem mihi nunciata, statim quinque cohorteis Pollentiam præmisi, meumque iter eo contuli. Hora ante præsidium meum Pollentiam venit, quàm Trebellius cum equitibus. Sane quàm ium gavisus! in hoc enim victoriam puto consistere. In spem venerant, quod neque Plancii quatuor legiones omnibus suis copiis pares arbitrabantur, neque ex Italia tam celeriter exercitum traici posse credebant. Quos ipsi adhuc satis arroganter Allobroges, equitatusque omnis qui eò præmissus erat à nobis sustinebant: nostrique adventu sustineri facilius posse confidimus. Tamen si quo etiam casu Isaram se traiecerint, ne quid detrimenti rei publicæ iniungant, summa à nobis dabitur opera. Vos magnum animum, optimamque spem de summa republica habere volumus, cum & nos, & exercitus nostros, singulari concordia coniunctos ad omnia pro vobis videatis paratos. Sed tamen nihil de diligentia remittere debetis, dareque operam, ut quam paratissimi ab exercitu reliquisque rebus, pro nostra salute contra sceleratissimam conspiracyonem hostium confligamus, qui quidem eas copias quas diu simulatione rei publicæ comparabant, subito ad patriæ periculum converterunt. Vale.

*Cicero Bruto S. D. Brut. ex epist. 6.*

14

**S**cripta & obsignata jam Epistola, literæ mihi reddiæ sunt à te plenæ rerum novarum, maximeque mirabiles:  
 \* Dolabellam quinque cohortes misisse in Chersonesum. Adeone copiis abundat, ut is qui ex Asia fugere dicebatur, Europam appetere conetur? Quinque autem cohortibus quidnam se facturum arbitratus est, cum tu eò quinque legiones, optimum equitatum, maxima auxilia haberes? Quas quidem cohortes spero iam tuas esse, quoniam latro ille tam fuit demens: & tuum consilium vehementer laudo, quod non prius exercitum Apollonia Dyrrhachioque movisti, quam de Antonii fuga audisti. Bruti eruptione, populi Romani victoria. Itaque quod scribis postea statuisse te ducere exercitum in Chersonesum, nec pati \* sceleratissimo hosti ludibrio esse imperium populi Romani, facis



LIBER QVARTVS.

facis ex tua dignitate, & è Republica. Quod scribis (de seditione, quæ facta est in legione quarta de Antoniis (quod dicam in bonam partem accipias) magis mihi probatur militum <sup>\*severitas</sup>, quam tua. Te benevolentiam exercitus equitumque expertum vehementer gaudeo. De Dolabella ut scribis, si quid habes novi, facies me certior: in quo valde delector me ante providisse, ut tuum iudicium liberum esset cum Dolabella belligerendi: & id valde pertinuit ut ego tum intelligebam, ad Rempublicam; ut nunc iudico, & ad dignitatem tuam. Quod scribis, me maximo animo egisse, ut insectarer Antonios, idque laudas, credo ita videri tibi, sed illam distinctionem tuam nullo pacto probo. Scribis enim acrius prohibenda bella civilia esse, quam in superatos iracundiam exercendam. Vehementer à te Brute dissentio, neque clementiæ tuæ concedo, sed salutaris severitas vincit inanem speciem clementiæ. Quod si clementes esse voluerimus, nunquam deerunt bella civilia. Sed de hoc tu videris. De me possum idem, quod Plautinus pater in Trinummo. Mihi quidem ætas acta ferme est, tua istuc refert maximè. Opprimemini (mihi crede) Brute nisi provideritis, neque enim populum semper eundem habebitis, neque Senatum, neque Senatus ducem. Hæc ex oraculo Apollinis Pythii edita tibi puta, nihil potest esse verius. 14. Kalend. Maii. Vale.

**DOLABELLA** Ciceronis gener, aliquandiu bonum civem simulavit, ut erectam Cæsari in foro columnam everteret: Postea ab Antonio corruptus Rempubl. deseruit, & Syriæ administratione à populo accepta, victus à Cassio, Laodiceæ oppressus, servo suo civem ferendam præbuit. Appianus.

**SCELERATISSIMO.** Dolbellam ita vocat, quod noctu Trebonium Smyrnæ improvise accessu oppressum occiderat. Addo quod Senatus eum in hostium numerum retulerat.

**SEVERITAS.** Milites qui seditionem fecerant ut delictum suum quodam modo corrigerent seditionis auctores occiderunt, Questorem & Legatos C. Antonii ad necem depoposcerunt. Dion.

Cicero S. D. Titio. Fam. 5. 15.

15

**E**T si unus ex omnibus, minime sum ad te consolandum accommodatus, quod tantum ex tuis molestiis cepi doloris, ut consolatione ipse egerem: tamen cum longius à summi luctus acerbitate meus abesset dolor, quam tuis, statui nostræ



## LIBER QVARTVS:

nostræ necessitudinis esse, meæque in te benevolentia, non tacerere tanto in tuo mœrore tam diu, sed adhibere aliquam modicam consolationem, quæ levare dolorem tuum posset, si minus sanare potuisset. Est autem consolatio pervulgata quidem illa maxime, quam semper in ore, atque in animo habere debemus, homines nos ut esse meminerimus, ea lege natos, ut omnibus fortunæ telis proposita sit vita nostra: neque esse recusandum, quo minus ea qua nati sumus conditione vivamus, neve tam graviter eos casus feramus, quos nullo consilio vitare possumus, eventisque aliorum memoria rependis, nihil accidisse nobis novi cogitemus. Neque hæc, neque cæteræ consolationes, quæ sunt à sapientissimis viris usurpatae, memoriæque & literis prodita, tantum videntur proficere debere, quantum status ipse nostræ civitatis, & hæc perturbatio temporum perditorum: cùm beatissimi sint, qui liberos non susceperunt: minus autem miseri, qui his temporibus amiserunt, quam si eosdem bona, aut denique aliqua Republica perdidissent. Quod si tuum te desiderium movet, aut si tuarum rerum cogitatione mœres, non facile exauriri tibi istum dolorem posse univèrsam puto: sin illa te res cruciat, (quæ magis amoris est) ut eorum, qui occiderunt miseras lugeas, ut ea non dicam, quæ sapissimè & legi & audiui, nihil mali esse in morte, in qua si resideat sensus, immortalitas illa potius, quàm mors ducenda sit: sin sit amissus, nulla videri miseria debeat, quæ non sentiat: hoc tamen non dubitans confirmare possum, ea misceri, parari, impendèrè Reipublicæ, quæ qui reliquerit; nullo modo mihi quidem deceptus esse videatur. Quid est enim jam non modo pudori, probitati, virtuti, rectis studiis, bonis artibus, sed omnino libertati ac salutiloci? Non meherculè esquenquam audivi hoc gravissimo & pestilentissimo anno adolescentulum aut puerum mortuum qui mihi non à diis immortalibus creptus ex his miseriis, atque ex iniquissima conditione vitæ videretur. Quare si hoc unum tibi detrahi potest, ne quid iis quos amasti mali putes contigisse, permultum erit ex mœrore tuo diminutum. Relinquetur enim simplex illa jam cura doloris tui, quæ non cum illis communicabitur, sed ad te ipsum proprie referetur:



## LIBER QVARTVS.

feretur: in qua non est iam gravitatis, ac sapientiæ tuæ, quam tu à puero præstitisti, ferre immoderatus casum incommodorum tuorum, qui sit ab eorum quos dilexeris miseria, maloque seiunctus. Etenim cum semper te, & privatis in rebus, & publicis præstitisti, tuenda ut sit tibi gravitas, & constantique serviendum. Nam, quod allatura est ipsa diuturnitas, quæ maximos luctus vetustate tollit, id nos præripere consilio, prudentiaque debemus. Etenim si nulla unquam fuit liberis amissis tam imbecillo mulier animo, quæ non aliquando lugendi modum fecerit, certè nos, quod est dies allatura, id consilio ante ferre debemus; neque expectare temporis medicinam; quam repræsentare ratione possimus. His ego literis si quid profecissem, existimabam optandum quiddam me esse assecutum: sin minùs fortè valuissent, officio tamen esse functum benevolentissimi atque amicissimi, quem me tibi & fuisse semper existimes velim, & futurum esse confidas. Vale.

## FINIS.

